

聽
雨
樓
隨
筆

聽雨樓隨筆卷二

渠縣李珪順治丁酉舉人弟瑄甲

登奎樓云城郭參差暮靄收重來此地不勝愁王孫前路
誰青眼父執於今半白頭葉葉棠梨霜後赤家家楊柳雨
中秋遺碑讀過腸隨斷蔓草寒煙迸淚流丁未下第後同
潘遊擊新吾話舊感賦帝里黃塵軋敝裘霜華暗逼鬢毛
颯也知侯印憎猿臂可耐儒冠誤虎頭抱璞幾年羞楚荆
據鞍三歲哭吳鉤何當挽起滄溟水澆盡男兒萬古愁三
山雜感珠簾繡柱城西路父老猶誇未戰前他日尉陀專

聖綬幾年楊僕擁樓船春城晝閉飛飛燕野水晴看點點
鳶只有無諸臺畔草東風依舊綠綿芊青絲珠絡散平蕪
二月春郊草尙枯宛馬自來甘苜蓿魯人今復峙麥芻空
村夜醺庸身值廣陌晨飛趣市符蒿目遺民成痛哭五年
剜肉給征輸璫歲暮感懷步二兄原韻蜀山閩海思悠悠
暮角邊笳滿戍樓泉石近知何處穩風烟遙接故園愁投
身可得如張儉洗耳還應似許由誰念飄零荒瘴地南冠
千里獨羈囚聞笛晚霽江城夜氣清寂寥孤月對愁明誰
攜羌塞三更笛吹作吳山十月聲豈有梅花開更落自驚
楊柳折還生天邊舊業歸何日爲爾今宵夢不成榕城雜

咏民力東南人驛騷尙聞飛艦欲凌濤將軍自許標銅柱
長吏誰曾過石壕菊草夜呼朝市閉海田春隔繚垣高何
當借箸籌方略願罷乘風破浪艘別孫無燂璧社棠陰晚
未殘相逢誰復問南冠令君座上香三接公子門前鋏幾
彈人客未聞生馬角累人何止愧猪肝擬將千尺珠湖水
深比桃花一樣看秋興集唐十首沉雄瑰麗一氣流轉運
成句如出己手尤絕技也城上高樓接大荒汀洲雲樹共
茫茫天空絕塞聞邊雁葉盡疎林見夕陽舉世盡從愁處
老暮年初信夢中忙休將世路悲塵事且放懽情入醉鄉
自知無復解趨奔生事蕭條空掩門豈止形骸同土木試

將生計問蓬根尊中美酒常須滿身外浮名何足論食檠
苦心甘處困應須騎馬到沙村滿庭松桂雨餘天燈灑秋
光靜不眠心似虛舟浮水上影籠殘月到窗前門閒多有
投交客愁極兼無買酒錢張邴宦情何太薄不勞詩句詠
貪泉搖落深知宋玉悲夕陽樓上笛聲時愁如酒醖終難
舍心似孤雲任所之最愛葛洪尋藥處却嫌陶令去官遲
此時愁望情多少故國無家淚欲垂滿崖霜樹曉斑斑清
淺縈紆一水開長對碧波臨古渡不堪紅葉映衰顏誰言
有策堪經世何用將金別買山只此引人離俗境朝看飛
鳥暮飛還綠蘿陰下到山莊爲報秋來雁幾行赤葉黃花

隨野岸碧樓紅樹倚斜陽偶因麋鹿隨豐草莫指雲山認
故鄉若使巢由知此意濯纓何必在滄浪亂離無處不傷
情汨滿殘陽問楚荆南國羽書催部曲故園田土憶春耕
殊方日落元猿哭遠客愁多白髮生 聖代止戈資廟略
諸君何以答昇平休將文字占時名買賦何須問馬卿彩
筆昔曾干氣象青袍今已誤儒生風生寒渚白蘋動鷺立
蘆花秋水明白歎猶爲折腰吏不將蘿薜易簪纓分明記
得還家夢一路寒山萬木中野水亂流臨古驛夕陽和樹
入簾櫳風塵荏苒音書絕人物蕭條市井空目斷故園人
不至楚雲滄海思無窮高樓獨上思依依棣萼分張音信

稀霜嶺自添紅葉憾白雲空長故山薇數聚沙草羣鷗散
萬里雲羅一雁飛弟妹蕭條各何在滄江欲暮淚沾衣兄
弟可稱二難

孔君毓德山東曲阜舉人康熙閒宰昭化鑿石開路壬子
漁洋先生使蜀宿其見野亭題詩云葭萌朝掛席弭棹欲
三更月上嘉陵水山圍漢壽城主人具鷄黍邀客啓柴荆
修竹吾廬似因之故國情驛程記謂縣無城郭館舍觀鷄
黍柴荆句似畱宿山家其荒涼寂寞如見今有城而無亭
矣又虎跳驛詩路逗蒼溪縣荒涼破驛存流金稀見艇畏
虎早關門水合南江壯山連大劔昏巴西兵馬合多少未

招魂說者謂南江合宕渠至合州入嘉陵江距驛幾千里
漁洋未免失考愚謂作詩一時興到不必深泥如白衛嶺
亦在昭化蜀後主詩云前望隴山排箭戟後憑巫峽鎖寒
烟去巫峽豈止千里且渺不相涉非如嘉陵江之可連而
及也卽如渡黃河崑崙滄海亦可入詩不嫌其遠然卽景
言情不宜牽率遷就議論未嘗不正存之以當吳縝之糾
繆

桐花鳳二月桐花始開是鳥翱翔其閒丹碧成文纖嘴修
尾仰露以飲至花落輒去號爲鳳或爲人捕至樊閒飲以
蜜漿哺以珍粒可以閱歲蜀士以繪扇李衛公常爲賦贊

日金花之露俗曰鳳類綠羽纖爪藻背翠尾花落則隱以
是見貴鄉縣有來儀亭邑孝廉趙國泰字虞中有詩云綠
毛么鳳來桐花正開徧池水明空亭春光鎖深院眾鳥無
繁音離披五色絢樹梢飛不停風中自搖顛西園集清賞
東閣日傳讌對酒調銀箏看花隔團扇翩翩飛簾櫳去去
繞芳甸我聞小胥言惆悵不能見又桐花鳳辭云鳳毛綠
桐花紫綠毛映朝日紫花映流水春光搖落鳥亂啼花無
顏色鳳飛矣沱江兒女身著緋花邊冶步搖春暉陌上暖
風倒吹面但見花飛無鳳飛春樹紅顏都無夢妾似桐花
郎似鳳鳳飛花萎渾無情春情恰爲郎斷送一度花時一

度來枝頭葉底相毵毵鳳不來花不開

詩以比興出之最得風人之旨湖北徐陳謨迪皋蘄縣人
嘉慶辛酉進士同年曾暉春同在都候銓迪皋先得東鄉
明年暉春始得江西會昌作將嫁女二律以貽迪皋還是
春風待字身蹇脩邂逅悟前因暗驚老大將誰主敢怨蹉
跎錯嫁人守口先妨長舌厲乞憐羞效捧心顰更愁養子
何曾學辜負平生愛育真臨行疑信兩忽忽不獨丹砂記
守宮無米翻嗔新婦拙織縑轉讓故人工眉思悅已描難
翠脂爲逢時點要紅三日羹湯廚下試小姑情性更誰同
喻意曲盡

三
五
捷爲烈女陳國蘭幼失怙恃育于外家羅姓受楊鶴齡聘
鶴齡客遊十餘年或傳已死將別字之女啼號數日不食
自經乾隆五十二年請旌總督保公給從一而終扁多作
歌詩以揚之者縣尉周明德詩云江竹何青青獨立性不
毀卓哉陳國蘭幽貞堪與比未作鸞鳳棲甘抱冰霜死婦
人從一終閨閣宜興起夫婿从浪遊猶期白頭倚遽聞凶
耗歸絕粒靡他矢從容別兄嫂奄息趨舅氏虛窗冷環珮
敝簾萎蘭芷終焉葆清芬千載標彤史餓數日不死終死
于縊其志決矣激烈從容兼而有之縣尉長洲人詩亦古

雅可誦

于中行山東掖縣人乾隆十七年宰隆昌居心明恕洞曉
情僞而不爲苛刻令如流水邑無廢事嘗掘地得一物紫
色似石非石似鐵非鐵叩之有聲聞明熊球曾得于野而
瘞之今復出土也置署齋前榜其齋曰紫巖系以銘曰錚
錚者釜磊磊者石奚以完汝璞而今得加諸膝抑近代之
玩也與自古在昔署令朱孝純過紫巖作攝篆曾嗟吏治
紛三年蹤跡亦行雲官橋辛苦蹄涔在楊柳依依識使君
早魃當年偶作災流離婦子倏堪哀爲憐夜禱金鵝水親
見神魚跋浪來訟庭曾此坐鳴琴松桂蒼蒼接野陰鐵柱
峰前冰月在應知勞吏撫民心邑令朱雲駿紫巖詩卷石

勢嶙峋蒼然立煙磴乳泉漱其根松風滿清聽何年泗濱

浮戛擊聲如磬

孝純號小溟
雲駿號畫莊

蜀稱天府又號陸海蓋以江水之利灌溉無窮也江流自
汶川而南其北無水秦太守李冰鑿離犀虎頭以通流於
江中設象鼻七十餘丈又籠石護岸水不蝕土洪流既潞
號曰都江作堰以蓄洩刻六字于石曰深淘灘低作堰蜀
人至今食其德至元閒廉訪僉事吉當普于大江中以鐵
六萬六千斤鑄大龜以鎮其源明嘉靖僉事施千祥以鐵
七萬斤鑄牛二各長丈餘首合尾分如人字以其銳迎水
之衝萬厯巡按郭命又于牛外植鐵柱又于岸閒植鐵柱

三十各長丈餘踵事增修其利益永按冰于玉女房下作
三石人立水中令子二郎作五石犀立江南岸皆以鎮水
怪也朱凌雲詩云浪架嶺頭溢觴水習習喧厠層巖裂
雲披霧到離畢分支別派迅如駛憶昔蜀守勞疏鑿擬之
龍門功相若治水良法厯代傳灘須深淘堰低作祇今
聖主重民依循吏承命繼前徽歲奉長茭櫓石傳益州
胥慶稻梁肥我本生居導江縣閒步長堤情不倦快觀
盛世畜洩宜千村萬井安耕佃

逆匪起時新寧無歲不被兵亂既定復有達州營兵王得
先之變夔州副將桂養齋適至新寧謂令日賊必至吾回

東鄉招鄉勇來速滅之不一日率舊日鄉勇千人渡河而
賊已從萬家壩來桂知鄉勇與賊皆素識戒勿通語以鞭
揮兵直前奮擊又遣一隊繞賊後首逆被擒一戰奏捷後
爲提督至清溪征猺猺催餉不至憤激成病卒新寧感戴
尤深其壻孫代芳輓之云天生元老作長城保障端資義
旅營酣戰十年殲巨寇教匪之亂十年平定揚威萬里怖先聲征果洛克
往還萬里偏裨那不傾肝膽婦孺都能識姓名倚重方殷
身遽殞全川洒淚淫雙旌瘴雨蠻烟聽鼓輦大星一旦墮
清溪剋期竚掃狼氛淨落月驚聞杜宇啼遂志原憑三尺
劒成功尙待一九泥沒於王事復何恨馬革還尸漫並題

一病沙場得善終蓋棺今日定英雄鄉邦秉鉞膺專閫册

府銘勲爵上公壽考神明原矍鑠老成智慮竭精忠

垂危時無

一語及家事但亟問獲首逆否

捷書剛遞馳凶問盡瘁無慚殫厥躬將軍

儒雅近

龍光

天語褒崇寵異常

道光八年上謂軍機大臣有桂

陛見

涵勇而儒雅之譽

謀略不殊班定遠勲名直比郭汾陽

彤廷賜

卹君恩重弈葉蒙庥世澤長

上諭見諸子成立者獨侯服闋引見加恩

獨

愧駑駘爲半子青雲有路未騰驤

公芳之外舅故知之更悉

張曾敏字遊求號鳬門安徽桐城廩生乾隆三十九年任

屏山作縣中雜咏正可作竹枝讀也曾說滇南萬里遙如

今一葦不崇朝空庭月上濤聲靜夜半還聞隔岸簫龍湖

山色景重重綠水中分兩岸峯豹子灘頭朝放艇一時齊

倒碧芙蓉舟到安邊放眼寬白雲紅樹兩漫漫灣環別派

橫江水原是當年釣月灘

馬湖原界至橫江今截屬雲南

書樓山勢最嵯

峨酒興詩懷逸趣多聞得此閒歌鳳翥至今猶憶薛公過

薛文清公講學於此一時登科甲者甚眾

山腰徑窄半臨淵石磴紆回繞暮烟

忽地瀑懸千丈雪加鞭走馬過飛泉江干黃葛午陰涼暫

解征鞍倚道旁安得此閒客一枕濤聲雲影落匡床萬重

山裏數平田百畝膏腴愛沐川一片水光明似鏡遠峯環

照黛螺鮮清水河邊柳眼開漁人家住碧潭隈扁舟一放

垂楊岸尺半銀鱗人網來肩輿牽挽人層巒岫側峯橫足

底攢霧起忽迷川谷隱相看人在白雲端山人種竹滿山
隈無事深林妙剪裁截竹作筒筒接水清泉白丈隔溪來
逸事多教屬野農柴門時倩白雲封籬邊犬吠無人問斗
栗磯頭水自春笑是川中景不同榜人乘浪不乘風鄉思
獨有江南客小艇輕帆想像中繞城千里水迢迢不見銀
鱗躍暮潮有客欲歌彈鋏句街頭誰喚賣魚橋金沙江與
馬湖通盡日洪流獨注東無限蘭橈乘浪出滇南官廠運
京銅深巖有木不知珍老榦枯枝積水濱一夜濤聲春漲
下江千人拾自來薪灘高溜急水潺潺舟子偃僂石窟閒
千尺纜牽船尾掉終朝猶未過前灣龍溪咫尺有仙寰秀

出羣峯霄漢閒六月寒輕人遠至瓣香爭拜老君山山中

絕少水田耕那識嘉禾有玉秔終歲饗飧炊握粟

山中謂包穀

同爲粒食太平氓採筍重巒帶擇提林深菁密白雲迷斜
風吹雨歸途滑苦竹叢中叫竹雞深山託業業何堪半種
黃薑半種藍燒塢盡開勤苦作客來雞黍快幽探田家數
畝種山南婦子曾無一刻耽饑餉歸來慵不得又提筐葉
飼春蠶

嘉慶元年逆匪王三槐冷天祿起東鄉應徐添德破城自
後屢被寇至二十年徐陳謨到任始修城垣甲子孝廉張
汝誠紀以詩云萬里孤城萬仞山清時人老太平閒處堂

那計豺狼窟築室誰虞虎豹閑幾代因循餘故壘一朝羣

固峙雄關鯁生欣隸旻幪宇喜極回思淚轉潛清獻祠堂

懸日月

江獻賊亂蜀東邑失守松

睢陽氣節薄雲霄

元年白蓮賊王

三槐等陷城仁

丹心廟貌魂猶烈白骨沙場恨未消

未亂二三

年前河水漲刷教場

戰守無憑天地窄覬覦難免虎狼驕

早知陰雨綢繆計忍使生靈付獍梟荒寨棲遲十八秋後

移治大成寨十

烽烟倉卒費綢繆誅茅築土開官舍樹柵

依崖起戍樓香海恩深鴻未集

楊香海師蒞任十二載恩威浹洽屢欲建脩以民力

未紆晴湖日淺寇難留

晴湖張刺史署任一載方議脩以陞任去

福星照處妖

氛淨談笑從容展大猷櫟槍久已洗天河山谷爭聞放犢

歌十仞崇墉雄且固三江流水靜無波
東邑有前後中防三河漚流城下防
奸非恃金湯險足食閒儲米粟多惟祝後來賢父母於斯
地利計人和

放翁花譜載彭縣牡丹之盛與洛下等丹景山奇峯積翠
幽壑清泉多牡丹有高丈餘者天彭之名聞天下縣中古
蹟勝地甚多李雨村有紀彭縣詩數首彈丸原是周彭國
曾與諸侯會孟津漫把昔賢來竊比老彭便是此邦人牡
丹舊數古彭稠京洛遺風俗尙畱孟氏繁華能幾日今人
猶自說花州
花州孟氏移上苑牡丹植此
東湖春水對西湖仿髯山陰
祓禊圖昔日樓臺今已圯茂林修竹有還無
東湖唐元和守王潛蕭祐

創東湖宋元符南樓百尺壓城端湖影山光動赤欄誰似
袁鵬有記今廢

風流文太守題詩千仞並巔峴南樓文湖州有句云仞西

北天屏是此州峭青危碧吐靈湫要觀六月岷峨雪試上

西城望雪樓望雪樓在城西丹翠蒼茫接翠微太妃輦跡半依稀

臉脂不用夸嬌蝶夢裡遠遠何日歸丹景山徐妃有句云

八十一洞若魚貫二十四峯相蟬聯至今葛瓊丁東水疑

是韋皋富貴泉葛仙山昔葛瓊寄韋皋云漓沅治裡鴻都

觀響石關頭白石溝高尙原來於此隱虛傳范蠡五湖舟

漓沅治范蠡學道處碧岫丹岑煙樹攢龍懷山本似龍蟠蜀中寺碣

多名蹟只數初唐王子安龍懷寺唐王勃有碑九隴雲峯盡出奇二

郎功德有專祠石犀不動波濤靜風雨長畱誓水碑

李冰誓水

羅提臺思舉膽力過人將軍明亮甚奇之常以五人偵賊遇賊數千慮不得脫急令五人悉受縛僞爲賊擄得者賊至索其人給以須人往背所攜財物候之約與同行遂脫免威名甚著賊望旗幟輒走念賊不戰終不滅乃易服入民寨賊果來攻奮勇擊之斬獲殆盡有奸民結寨自衛無問官民輒尾其後抄掠乃令眾兵先過已與健者伏草中輜重在後奸民望見出掠自草中突起斬獲甚眾餘皆逃散爲千總時攻安樂坪地險眾帥進攻多失利自請以身

先夜率百餘人攀藤而上守卡者睡熟手刃之因風縱火
賊夢中驚潰方戰酣左目中矛傷不覺選一二百人越澗
投石精練無不以一當百常謂人曰吾不擊賊心不快聞
警輒忻然忠勇多智其天性也賊王三槐等起東鄉羅桂
兩提督亦生於斯蓋惡人造罪自當罹劫旋生收殺運之
人足見造物仁愛亦皇仁深厚默邀天眷於無已也豈
非億兆之福羅提臺字天鵬

羅慎齋典湖南湘潭人乾隆閒爲四川學政年九十重赴
鹿鳴尙康強健步聶蓉峯之師也與石琢堂相善同遊衡
嶽時慎齋方掌教嶽麓書院琢堂校士楚南將回贈詩兼

留別及門云濂洛淵源仰數公名山壇席古今崇共傳薪
火歸吾黨常使弦歌聚此中四面烟蘿衡嶽近一時風詠
舞雩同白雲紅樹秋容絢始信文章大塊工登山臨水客
將歸閒覓籃輿陟翠微河嶽英靈思夕秀泮林襟佩憶初
衣程門雪裏春長在郢曲人閒和亦稀幾輩鳳鸞猶息羽
此心常繞白雲飛慎齋不輕作詩亦走筆和云理學深傳
仰鉅公山齋雲壑置身崇塵喧隔斷平沙外清福流連好
日中覓句早梅緣昔有停車霜葉得今同兩番題品皆椽
筆畢秋帆第二人來寫未工老去橋虛號詠歸騷壇壯思
力全微及門官冷能供酒附尾輿輕得振衣獨學雄編貽

我厚說詩初稿証人稀直腸傾瀉疑傷俚未暇推敲任筆
飛和韻字字穩愜而意味更覺深厚開館朗江時有和朱
幼芝院中賞荷韻云自是紅香濯滿池栽培無力負皋比
編成脫穎錐如許並作生花筆亦宜謝句芙蓉君手出毛
詩菡萏我心知頻來莫算肩輿值月曉風清雨過時

朱名景英

乾隆庚午解
元能記前生

成都海棠之盛聞於天下兵燹以後少有存者署榮昌傳
聞有海棠獨香亦杳不可尋嘉州海棠亦子虛之賦獨蔡
麟趾交枝海棠一詩婉媚可誦耳嘉陽海棠號香國佳種
分來稱奇絕種向丹邱不計年雙株環抱虬龍纏文窗窈

宛篆烟碧花枝掩映相新鮮春來開放一萬朶垂絲纍纍
櫻桃顥燕雀驚飛不敢窺桃花馬上紅粧墮花光籠罩三
丈餘下有芳草鋪庭除有時花葉落無限紅英綠莎色相
閒開樽席地與花對舉杯邀花花已醉依稀太真睡起時
沉香亭北欄杆倚蜀中烽火燭天長錦城宮闕同咸陽滄
桑幾變陵谷改此花獨畱嬌春光人生局促不滿百我來
看花頭半白安得三萬六千觴日日提壺醉花傍

署興文時自梅橋壩入境一路山石甚奇問之皆屬江安
心異之恨無人傳之也有林良銓者乾隆初爲瀘州牧工
詩遊江安詩有小序云自拖船了至梅嶺怪石奇峯蜿蜒

四十里不絕應接不暇予幼時性喜著屐遊覽名山水頗多而天然秀麗無出此右者口號一詩不足狀其萬一也可知佳境未經刻畫者甚多第不知嶺在何鄉詩比以武夷華嶽未免過當末云彷彿輿從雲裏度依稀身在畫中行從今休說山陰道那得幽芳此一程

席世綢江蘇太湖人嘉慶四年署渠縣剿達縣教匪軍務倥傯民無擾累于其去也黃童白叟遮道攀轅有畱別士民詩四首馬蹄到處踏巔峴浹歲經營力已殫散賑荒原鴻羽肅從戎邊塞角聲寒澄清似水談何易負重如山去亦難正是麥秋時節好黃雲一望路漫漫厯碌軍儲轉運

頻名場何事太勞薪此來但飲流江水歸去還尋錦里春
未解劒牛難紀績並無琴鶴始稱貧羽書莫便催裝急多
少攢眉待濟人二三舊雨自知名飲射閒時亦送迎藉以
文章規雅正每於詩律究縱橫雲移遠浦開新境花擁征
鞍載別情湧月臺前今夜月祇應相對有餘清漫勞遠近
挈壺觴老幼分攜載路旁山色低徊猶可戀民情繾綣那
能忘江頭日落三杯酒渡口人行九曲腸佃爾田還宅爾
宅閭閻生計只耕桑

嘉慶五年賊乘元宵搶渡嘉陵江署總督魁倫檄朱射斗
赴援射斗勇冠三軍進至老虎巖遇伏力戰死參贊德楞

秦自陝入川由廣元繞出江油扼其要路轉戰至馬蹄岡
賊萃九股之眾四路拒戰參贊分兵應之眾寡不敵勢甚
危參贊下馬踞地以死勵軍士賊忽披靡四散自相踐踏
冉添元乘朱射斗戰馬飛奔池中不出官軍聞賊眾呼元
帥遂共擒之鎗斃其弟添恆方戰酣時見朱總鎮人馬自
天而下沙石飛揚故賊潰也械送添元於成都磔諸東市
首重十八斤其心黑嗟乎朱公生能殺賊死且爲神報國
復仇豈不烈哉乃其馬致賊首於死地大快人心亦當塑
於廟門

沈澹園觀察清任浙江仁和人與吳白華學使顧晴旭臬

憲以詩唱和所至好爲題咏和朱小湏登都江廟閣畱題
序云朱東海題壁閱五年矣甲午嘉平念又一日張椿山
邀余小敘此閣醉塗西壁復和前詩時東海爲泰安郡守
卽以寄懷並示來通道人也爲訪梅花出郭尋松杉小閣
倚雲深畱題舊有虬仙跡潑墨新看醉客臨一帶江聲寒
日短四圍嵐翠酒杯侵瑤臺笙鶴無消息泰岱峰高悟道
心原作道人何處費幽尋松樹參樓綠雨深萬里江源爭
瀕洞百蠻嵐翠倚登臨煙霞冉冉丹經祕天地茫茫華髮
侵濟世無才思出世白雲仙更有遐心

余再宿長寧未見有松國初時尙存邱上峯有詩甚蒼勁

序云邑治署中有古松五章不知幾歷年所挺姿夭矯龍
鱗虬鬣屈蟠萬狀對之寒肌生粟恐虎頭妙筆殊難髣髴
晨夕瞻仰穆然起敬愴然感興爲賦何代盤根歷風霜五
老鬚眉鬱蒼蒼餐霞沐露孕元氣踈幹盤礴摩天揚騰跳
怒姿衝碧落餘枝攫拏披分張虬龍偃蹇青銅色長風反
走轉昂藏霜皮鐵甲夜叉臂虬鬣爪鱗會騰驤排雲鋪蓋
翳白日踈影亭亭落印床不希秦岱秦封號不愁月窟斫
吳剛天風颭颭海潮上空半宮商和琴堂蒼翠陰森來元
鶴唳如文鳳噉高岡松下招鶴彈琴者誰氏是否當年清
獻來雙江垂芑石谿花兩岸羣芳蒙蔭滋而昌嗚呼五松

果爾比甘棠仰止清操彌徬徨屬爾斧斤無剪戕千年脂

珀鬱含香

字眉三號銘

天池在硯山下爲寇萊公所開產白蓮常多並蒂乃希夷
所延者尤秉元宰樂至白蓮盛開置酒池上作詩云天池
之中開白蓮天池蓮種仙翁傳仙翁種蓮去已久天池之
水常瑩然尋源近在硯山麓小橋宛轉依山前泉流一半
就淤塞誰復疏鑿開晴川我來蒔花樂城下樂陽花發紛
綿芊重尋蓮種繼遺蹟一池蓮葉生田田仙姿出水謝瑯
飾冰肌玉骨清而妍風前珠瀉葉泛泛雨餘香放花娟娟
官衙日永了公事納涼池上時盤桓臨流酌酒不知暮醉

倒何妨石上眠山風振空月東出醒來疑在清虛天水濱
花開如有意清風明月原無邊傳與樂民共遊賞不須更
問華陰仙秉元江蘇元和舉人乾隆七年任

鹽亭張澎才優學贍嘗賦蓮花漏某制府覽之大賞贊贈
以二金杯稱爲西蜀才子第一僅領鄉薦後無聞

詩有淺淺着筆而意味悠長者陳書詩云淡淡蒼烟谷口
迴驛門古道長莓苔莫驚衣帶清香滿適向梅花樹裏來
陳書鹽亭人康熙進士

富順唐德一字長民號棠溪吾東循吏也幼有神童之目
雍正丙午舉人丁未登明通榜授山東平原令摘奸發伏

若神明有曾姓者已定婚豪右強委禽焉屢訟不伸立訊
得實捐俸爲奩當堂成婚置豪于法二載引歸民知令貧
歛金以獻不受祖餞十餘里不絕有夫婦抱幼子叩首于
路者卽曾姓也在任時邑人孫今延董元度皆受業後俱
入翰林元度號曲江博學工詩深爲曉嵐先生推重告歸
後造就尤多乾隆丙午重赴鹿鳴年八十三子叔元丁酉
孝廉隨侍弟德隆德達德嘉皆文學年登耄耄六世同堂
人號其里爲仁壽里

粵西有扶乩於湘山者箕動自言蜀女吳氏小字碧蓮隨
父任未笄而歿葬此岩下題詩甚悽婉詩云裙布荆釵尙

有家可憐隨宦喪天涯湘春門外波千頃洗鉢崖前路幾
久怪石空畱寒月掛青山長伴夕陽斜鳳凰臺上難回首
何劫能開並蒂花請再次前韻又題一首曰燈火熒熒古
寺家含情默坐恨無涯柔腸淚落湘江冷冰骨魂飛蜀道
又佛殿有聲鐘磬合荒烟無樹野蒿斜青山綠水依然在
故冢蕭蕭蘆荻花具此靈心香魂固應不泯一時名輩多
和之今年六月王遲士周東泉與兒子紹宗共請乩仙降
壇白書青峰玉女作詩云畫得雙蛾似遠峰強開明鏡拂
盤龍衫裁杏子春痕淺門掩梨花午睡慵歡喜光陰還憶
昔淒涼院宇漫愁儂自憐消瘦今年又怕見西家窈窕容

又書云諸君看似修真語否持以見示余曰此春閨詞耳
吳詩無仙氣有鬼氣此詩並無鬼氣或仙人遊戲耶及他
仙至問玉女何人詩何意仙云係元人誤落紅塵後得全
真因奉勅往我眉監採仙藥作長生會故匆匆而去詩特
追述其平生也

明督師呂東川大器安岳人殉節貴陽子名潛字耘叟髫
年登第絕意仕進工書善畫自號半隱綿竹令王謙言因
其同邑唐載思求得書畫詩以爲三絕集唐長律贈之半
隱詩漁洋曾選入感舊集不具錄錄王詩才高登上第方
人望積南宮包繼世新恩厚李思酬主澤隆徐時艱方用

武卿劉長勢屈難爲功甫杜回顧長安道盧照仍觀都邑雄蘇

鼎湖龍去遠甫杜人海畫塵蒙無悵望悲迴鴈元精識貢白

虹王賈戀親惟委咽張九齡移孝入爲忠張九齡巖谷成君父

黃山河誓始終甫杜市朝今日異甫杜詩酒古人同王勃猷猷孤

城外甫杜行歌荒野中白興來綃潑墨容詠苦月敲空曹中

散詩傳畫司空曙陶潛屋不豐白居易菊花垂溼露李賀竹影漏

寒叢王賈高節人相重張九齡虛心暗在通張說神交疲夢寐

約歌韻頌絲桐王昌齡麗句慚虛擲元稹浮生任轉蓬甫杜含毫

意不淺錢起垂範播無窮裴逸韻知難繼皎然陳詩且未工王維

火雲滋垢膩甫杜清潤仰磨礪陳師願接烟霞賞李端高談破

宋龔

張九齡

謙言江西安福舉人康熙三十五年任

隆昌縣石谿橋石壁上聖書一絕句云桃花依舊放山青
隱几焚香對畫屏記得去年春雨後燕泥時汚石谿亭與
晚唐儲嗣宗小樓絕句大致略同但易太元經爲石谿亭
耳朱邁人官于蜀見之爲人傳誦漁洋采入詩話朱畫莊
雲駿宰隆昌爲立亭徵詩遂爲故事先自和一首云水流
采采草青青一片風光接玉屏春雨又開花半樹飛鴻幾
度短長亭時和者甚盛厯城朱明府琦次韻四首云羣峯
不改雨餘青題字雲迷九疊屏却怪懷巢新燕子春來依
舊覓空亭偶逢佳句眼還青七字流傳白玉屏不是吾家

多好事遺蹤誰訪石谿亭村村花柳野煙青遺墨消磨虛
翠屏好傍谿山佳絕處更臨略約結茆亭春山長繞縣門
青尙憶高齋六尺屏過客匆匆成濶別無緣畫壁向旗亭
杜廉使王林云巴山雨後晚來青人在圖中看翠屏燕子
巢空花落盡春風依舊短長亭露冕依依柳色青漫將詩
句寫雲屏石谿橋畔知何處回首蒼茫載酒亭沈太守清
任云谿上春山放眼青畫闌紅燭醉銀屏鳥啼花落尋常
事欲結漁洋詩話亭李太守永祺云雨過春嵐分外青何
人點筆拂雲屏桃花開落空山裏惟有谿聲度野亭高司
馬芝云萬疊雲山入望青恍然身世到南屏年前殘雪梅

花候人在孤山放鶴亭谿亭重構舊山青亭外山花簇錦
屏極目雲天重回首故鄉五百五長亭楊刺史潮觀云小
春時候草還青玉壘行人入畫屏杳靄雲山何處是茂林
啼鳥歇涼亭蜀道天高萬點青一山一曲盡如屏石谿橋
畔題詩處何似臨邛春草亭吳刺史蔡孫云數峯渺渺數
峯青漱石泉飛挂錦屏芳草路迷人跡斷詩魂猶遶舊谿
亭陸明經炳云燕不尋巢春自青看山空復羨如屏阿誰
迷却桃源路腸斷谿橋是阮亭徐大令鼎亭云蜀江水碧
蜀山青春雨年年溼錦屏詩史到今傳軼事啼殘杜宇石
谿亭李大令元奮云萬壘奇峯未了青美人踪跡隔雲屏

隆橋驛外石谿水今古含情是此亭吳大令映白云晴山
新洗佛螺青雲態花容入錦屏攬勝最宜招客飲石谿亭
是醉翁亭趙大令憲高云葳蕤滿徑草痕青點染谿山幾
幅屏名跡重開觴詠地右軍未許擅蘭亭段大令玉裁云
彩雉朝飛宿麥青春寒料峭入雲屏桃花流水仙源路合
著詩人一草亭臧大令榮青云石谿橋畔草青青谿外春
山列翠屏流水桃花自千古雪泥鴻爪一孤亭摩挲斷簡
眼偏清雅集重開六六屏贏得新詩題壁滿他年佳話播
旗亭劉大令逢泰云峯峯遠眺入雲青流水桃花遶石屏
記得隆橋風物好幾時重訪舊谿亭夢裏江南一髮青五

湖煙水微雲屏遂初時把樓峯志春雨香泥憶廢亭高大
令上桂云石谿環望四山青依舊桃花點翠屏佳句爭傳
人已遠夕陽何處訪空亭元太令時云芳原初見柳絲青
細雨斜風冷竹屏我亦江山流寓者不堪回首是離亭張
大令兆星云清香杳渺入谿青難把幽懷上紙屏借問石
谿倦遊客爲誰憔悴臥林亭楊大令宗岱云雲多不碍舊
山青小雨春寒溼翠屏橋畔有人歌妙曲相將賂句上旗
亭湯叅軍健萊云壽世書成付汗青循良應上御前屏
劇憐竹屋蕭蕭夜撫拾殘編到阮亭凌國學學會云茶杯
小住又山青谿口衙衙列石屏料得筭輿頻到日搜尋殘

墨立空亭凌瑞珠云小桃齊放舊梢青婉嬋遙嵐敞翠屏
約略百花潭畔見畫橋紅影落谿亭

陶友美雙流人生十歲父母俱喪友美哭踊不知所爲稍
長且有室每念父母猶嚶嚶作孺子泣康熙廿一年偶偕
友過青羊宮友美獨聞院內步虛音樂欲入覘焉友嗤其
妄友美遂獨入見諸羽士列坐一羽士以玉尺量其體曰
善士六世人身韶光七十有七俄聞天半風聲一衣雲帔
者飄然而下友美隨羽士前迎獨顧友美曰識我否友美
默然曰吾姓趙居太行山爾吾弟子別離幾日而不識耶
爾思父母甚苦爾父母已再生江右不可得見惟前生父

何國璽母楊氏居溫江田家寺可往求之爾妻呼爾急爾當歸也命童子送之還家初友美之入院也仆於道友呼之不應昇至其家五日矣至是歔然醒則妻方撫之泣既至溫求田家寺不得一父老曰古有田家寺今廢卽出家橋耳訪之果得何國璽夫婦年老孤貧如道人言乃迎歸孝養二十餘年卒友美後素食清修以乾隆五年庚申正月六日卒正七十七年也

德陽縣宋時有孝烈女張氏救父以死天爲降紅雨事聞勅建坊後人爲立紅雨祠歲時演劇以祭劉守德號壽山作長歌云澧有蘭兮沅有芷巾幘之中有男子男子讀書

學孔孟成仁取義事應爾嗟彼婉孌弱女兒生來從未讀
書史一朝熱血灑平原烏啼月落泣神鬼在昔妖氛播西
北歲占甲乙地爲紫橈槍星掩井絡暗芟夷不避孝感里
張家有女未及笄以身捍父不辭死香汗散爲侍中血瓠
犀敲作睢陽齒蛾眉宛轉白刃下可憐弱質荒草委此時
雲暗日無光蒼天囚之淚如洗杜鵑哀啼湘妃哭化爲紅
雨血相似緹縈一紙書曹娥一江水臨難不懼未若此別
有刮面引鏡勞耳用刀者猶是兒女情長耳豈如孝女殉
父事更烈不謂草茅幼賤乃有是里中士女感奇節建坊
作廟隆其祀年來荒祠生燐火茫茫事蹟漫無紀聊作浩

歌表前徽虹躔婺女光未已石可泐兮山之東流可罄兮
綿之沚小祠一燈大如豆千秋長照斜陽裏

順慶知府符兆熊號東厓在章谷隨督餉大臣桂辦理軍
務一日扶乩題詩云生死終由命窮通不必論三年空飲
憾功業屬他人問何人大書死難大竹知縣程蔭桂也程
字燕山號香巖浙江杭州孝廉乾隆己丑補官金川之役
守糧臺癸巳六月初七夜賊從西山壓下鎗石雨集火光
燭天與民夫固守納溪縣尉許濟東光人長身多力在科
多後山聞鎗聲知有變馳至挺矛殺入斃賊六七人程已
受傷仆地許令夫役背出其子烈冒火搶印天曙救不至

許程俱被害烈遇賊投河死至是問爲何神書蠻方土神

符與程素相識云

符河南寧陵人監生

洪雅有碑在馬頂崖劉文秀於此建造宮府僭王號刻石紀事俗呼爲蜀王碑李若沆有詩云消磨風雨蜀王碑萬馬南來欲帝誰 聖主應期開北極天心眷命宅西岐千坵疊疊餘芳草八面青青冷翠旗爲剔苔紋聲已咽不堪重聽話流離

德陽縣西三十里有仙女洞傳聞其事甚奇前人有詩客誦之命余和作仍用其韻聊以紀事云爾昔聞江皋女解佩相戲弄又聞天台仙青精飯亦供葢陽祕靈境有客爲

傳誦從禽美少年獵犬忽逸縱尋蹤漫追逐谷口狹若甕
嫣然兩仙姝迎笑欣目送緩步采靈芝瑤草誰爲種微風
響佩環霞裳飄欲動隨行過山坳巖岫嵌深洞薜蘿垂簾
幙滴乳成梁棟轉身忽滅影石壁青無縫微聞杵臼聲擣
藥將安用澗底水空流花閒鳥自哢白雲深復深迴頭恍
若夢異事播人間聞風慕者眾我欲從之遊蠟屐與誰共
疑有麻姑仙雙成爲侍從想像五雲閒翩然跨鸞鳳
青城山在灌縣西南八十里乃岷山第一峯有三十六峯
至大面山爲山之巔山後卽老人村道極險遠溪中多枸
杞盤根如龍蛇飲其水故壽夷堅志載關壽卿曾遊其處

日暮鳥啼猿嘯月出微明花香撲鼻視之滿山皆牡丹止
宿老翁家簞一物如小兒眾不敢食不知爲松根人參也
明日導往旁舍爭相延欸曰茲地無租稅經年無人迹畱
三日始出所見百餘人少者亦龐眉白髮此與漁人入桃
源相似近日漸通人迹染浮華而壽亦減矣太古淳樸之
風思慮少飲食淡爲後人鑿破渾沌高士所以入山惟恐
不深也朱凌雲詩云樹裏雲村擁翠鬟獨從世外駐童顏
養鷄翁荷鳩筇出抱犢人披鶴髮還入畫自應踰洛社采
芝何必羨商山須知此處乾坤別花木長榮古洞閒
巴中嘗有雪蓑道人詩文奇妙無塵俗語嘗揭聯於室曰

雪裡披蓑寒動一天星斗雲閒補衲暖回大地山河按雪
蓑不知何許人遨遊吾溜與張儀部相交能寫大字徑丈
小亦徑二三尺如龍蛇飛舞儀部愛而學之子孫以書名
青州衡王誕日道人於南山磨崖書大壽字刻成橫畫閒
可臥一人至今如故不知其何以書也大字石刻余多見
之傳爲萬厯時人或以爲仙

果親王來川厯名勝多有題咏善壁窠大書甚遒媚經相
嶺口占云奉使撫西戎嚴冬登相嶺古人不朽名千載如
斯永景仰諸葛公志亦壯矣越大岡山云已過連雲棧幾
重何如首險大岡峯行人莫漫生勞頓萬水千山不易逢

不憚其勞而以爲難逢作詩者尤宜具此識力

天台山宇中名勝彭縣有山亦名天台在縣西八十里有三十六峯古詩云天台三十六峯斜中有仙人數百家我來春酒家家熟滿山開放碧桃花詩有仙意比之桃源不知何人作也

巴州七十里恩陽廢縣之東有三峯山唐小說撫遺所載甚奇姑妄言妄聽耳云紅梅係上界仙人謫此山叢石間化紅梅二株其一南向吐花繁密北向者無花每南枝花放奇芬馥郁縣令張士遠建紅梅閣於其上後令王名瑞陝西人子鶚讀書山中至閣下聞歌聲啓視無人壁閒題

詩後書紅梅氏乃折枝貯瓶忽有少女自瓶出冰姿綽約
裙裾翩躚白云王母侍女姓張小字肖桃遂爲夫婦後王
公遷秩維揚鶚百計攜本去及中狀元因事出知恩陽仍
與梅遊三峯鶚悵然曰煙雲過眼風景已非石畔畱根處
依然一枝孕花女手指曰彼處洞有巴蛇名潛長數十丈
傷人多矣鶚請王天君誅蛇而女云謫滿緣盡亦辭去所
題詩云南枝向暖北枝寒一種春風有兩般憑仗高樓莫
吹笛大家畱取倚欄干山亦名義陽山山前有讀書臺巴
蛇洞閣前有仙女石

獻賊屠蜀惟不敢犯秦良玉乃有奇女子而名未著則劉

應選妻陳氏也爲什邡陳百戶女有膂力善騎射獻賊屠
縣人多依山築寨自保遂率團練札兩河口應選疾昏夜
賊擁衆來攻陳提刀出禦斬獲多人賊潰退去後結柵木
瓜坪應選死諸婦女避寇者皆依之隨教之戰陣練習刀
矛號娘子軍賊至陳身先拒敵居山四五年糧絕煮木實
炙雀鼠以食俟賊平散諸婦女各從人陳移夫柩歸葬苦
節以終

杜少陵懷古詩咏昭君似生在荆門咏負薪女若道巫山
女麓醜何得此有昭君村今巫山東九十里有昭君村李
專詩云空舫峽裏近花晨一綫天低不見春肯信山川如

此險鍾爲窮究竟無倫紅顏兔頰描難肖青冢龍沙怨未
伸世代屢移遺蹟在琵琶休撥暮江濱專字知山遵義人
貢生遵義初隸四川

花蕊夫人宮詞艷絕千古文人學士嘔心不能學步非獨
才華不逮緣未親歷其境縱極力摹擬皆隔膜耳宮中情
事夫人皆所熟悉而又輔以綺麗靡曼之筆隨手拈來皆
有生韻後人讀之宛如目覩也黃俞咏夫人宅云歌舞當
年進蜀王應憐遺址牧牛羊茸茸細草堆芳徑漠漠寒烟
覆短牆城上豎旗千載淚宮中題恨滿簾霜英雄多少埋
荒土不及夫人姓字香

江南監生陳
熙年制

咏文君薛濤貶其失節迂腐殺風景漁洋謂欲講道學不
如作語錄何必詩也董新策薛濤井云碧甃銀床不可探
井華清似百花潭深紅小樣箋誰染零落胭脂三月三陳
一汨琴臺云琴臺秋老木芙蓉落落銅官第一峯偏有女
兒識名士人生那不到臨邛風流蘊藉斯爲當行

楊國棟浙江山陰人涪州州同攝篆峩邊作竹枝詞頗得
蠻中風景佩風山外早風秋飛水巖前水亂流終日山南
與巖北風聲水色令人愁郎從峯頂看新晴儂住峯腰聽
雨聲一樣青山晴雨異儂心殊覺不分明亂猿啼徹晚烟
沉茅屋山村帶水潯楚語吳歌相遇處五方人各異鄉音

今年玉蜀滿山頭纔得開荒便大收共約鄰家賽神去瓜
蘆池上水初秋金山銀洞路無窮鐵窖銅坑一綫通聽說
萬人傭役處峯峯寶氣夜來紅高澤咸平十二家朝來市
上買新茶學成漢語同人說說是今年歲不差隔水牛羊
自在閒笳聲吹出古林間涇河日暮渾難渡一夜愁心月
落山蓬鬆雙髻亂盤鴉也解刀耕也績麻只緣生長深山
裡不識人間富貴家萬壑千峯雲影垂誰家橫笛中宵吹
東方欲曉角聲動夢醒山城聞子規陽山江上雨冥冥秋
草纔黃春草青多少獐人銅鼓曲年來親自太平聽

朱畫莊雲駿江蘇金匱舉人乾隆三十二年宰隆昌風雅

自命好遊山水隨在題詩有九日登迴龍觀詩觀在迴龍
山東麓山有瀑布雙流競飛石當其衝水流石上翻雪跳
珠頃刻萬變斷岸千尺灑然下墜聲如轟雷奇境也詩云
驚心節物向闌珊九日攜樽過石壇楓落江潭秋潦淨雲
藏佛壇曉峯寒素交不爽清風約黃菊初開白露溥無限
蒼涼乘薄醉振衣千仞思漫漫金鵝洞在迴龍山之後溪
水遶縣東南穿隆橋西折環山之趾下爲懸崖飛流如練
俗傳有金鵝藏內畫莊三月八日邀客遊焉詩云暮春三
月天風和游絲冒空燕掠波同人懷古訪金鵝支筇犖确
經坡陀曲徑隱隱聞鳴鼉萬壑交注迸漩渦凌虛正練懸

薜蘿皎若秋夕橫銀河平原王生胸星羅長吟抱膝坐綠
莎張君興高醉顏酡中州豪傑俠氣多語我築亭山之阿
日對飛瀑惟酣歌潺潺千載一刹那

清溪縣每日狂風晝號颯颯從萬里外來故謠云黎風雅
雨又有風洞青神令陳登龍詩云黎風自古天下傳我本
所聞未所見下車舍館未遑定大竅獻獻已先扇初猶和
緩被林木枝敲條擊葉驚顛少焉如呼且如號厥聲漸巨
波濤亂奔雷震霆怒橫衝金戈鐵馬鏖交戰濛濛飛凌自
天掀漠漠驚沙連地旋豈唯拔樹撼瓦屋已厭連朝苦無
閒吾聞大塊噫氣是爲風順時悅物本柔善胡爲斯地行

肅殺號令以嚴四時徧變荒瘴癘每中人昏鬱沉埋神氣
倦揚之則散天心仁猛濟寬行時偶變聖人盛德法乎天
一怒而妄見於傳

黃鑑字秋水昌黎人漢軍隸正紅旗康熙年任長寧善詩
著有千頃集讀吳松若中秋詩戲作萬山茫茫雲蒼蒼孤
城寂若無人鄉城頭秋雨飛昏黃啞啞栖鳥集女牆仰看
銀漢何茫茫蟾蜍走匿玉兔藏此夕何夕增悲涼安得道
士來我旁袖中取出一寸光散作空明萬丈長延陵季子
殊慨慷把酒問天歌激昂素娥驚起趨吳剛斧削蒙翳掃
八荒冰壺高懸白玉堂照徹下界窮毫芒眾山若響鸞鳳

翔耳邊恍惚聞霓裳此時爲樂樂未央金鷄且緩啼東方
詩筆揮洒自如查通志長寧令無其名疑誤

石泉在蜀西北隅峭壁雲連長江雷震一線羊腸奇險過
于三峽七盤割其一角皆可作巨然僧炤嵐圖觀惟是地
界番夷控馭爲難白草番昔稱難治今等齊民邑令姜炳
章有白草歌頗詳此地風土歌云明運當中葉邊事日紛
綸尙方無長子行陣仗私人吐蕃遺孽遍江岷白草跳梁
連風邨賊騎未連營官軍忽瓦解今日攻堅城明日燒官
解殺人如麻以其肉爲醢三巴秉鉞東沙君張公時微合疏乞
還何將軍都督何卿走馬嶺頭黑霧昏走馬嶺下漢軍屯將軍

誓軍門嗟我貔貅士如其抱頭生寧使斷頭死直入虎穴
得虎子天贊成功乃在此士盡啣枚馬不鳴風聲雨聲軍
無聲蜚弧而呼將軍登忽爾霧捲驚天兵軍威赫如電番
兵猶鏖戰將軍提卒九千人摧堅陷陣面當箭鵝乎鶴乎
鳥獸散鷁兒軍士搜賊營四千八百七十碣樓一日平自
此承平數十載野子狼心總不改歲在丁丑尋戈矛走馬
嶺頭營故壘開府王公武略雄王公廷瞻大帥劉君意氣同兵總
劉埋奴號罪折矢誓願爲白人從華風番民以白爲善
羌叛服無常性德布威行自效順天朝振鉞赫神武裂
闡馘獻清六宇西域三十六國歸版圖何况區區白草風

邨一丸土 朝議內地黜蠻官但教長吏爲慈父浸淫雨

露百餘年襁褓耨鋤安作苦兩度蒿花春復秋一身重穠

晴兼雨鐵脚銅鍋昏禮敦樹頭木剋錢刀數嗟我來作吏

驅車河西東大鴨渡徙小鴨渡小桃紅過大桃紅

四處皆番寨名

鱗鱗石瓦覆牆壁亦有高樓雄望中蠻女簪花雙辮髮系

帕裏頭螺鈿結兒童拍手呼阿叭我欲與言稱沒殺

番民呼官

府曰阿叭謂不知爲沒殺叭嚶雜嘈難爲聽喚譯譯來爲予說東隣父

喪焚父骨西隣殺牛療痼疾南隣持籌兒爲奴北隣負債

女離室願將化雨洗蠻風忍使吾民于三尺紛紛父老皆

點頭赭汗津津額額流人類雖殊人性侔何但朝鮮風俗

化箕疇風清月夜農家宿吠犬不驚案無牘忽聞隔隴有
書聲知是延師夜課讀梵然心喜喚出來親爲授句再三
告漫言禮義俗居然安樂鄉花椒樹樹撲鼻香磨菰杲杲
含春光番兒版築工番婦甃甃織不似漢氓鎮日醉燒香
誰云番土頗饒漢土嗇吁嗟乎依然白草與風邨昔爲戰
場今良民白草之民民更馴鷹鷂化爲鳩豺虎變爲麟武
臣不用武長吏惟推循秋霜春露威與恩會見百世無兵
革駸駸禮讓之化淳炳章號白巖江西象山進士乾隆二
十九年任

水經注禹生於蜀之廣柔縣石紐村唐爲石泉縣縣南一

里有石紐山發脉自黃土溝入白草番百六十里至關子
門九龍峯摩空而起其中峯則禹穴在焉姜炳章石紐歌
云石紐盤盤摩青天剝兒溪上血石鮮古傳神禹降生此
至今溪水生紅煙古石紐村此石泉我來作吏忽三年登
石紐之山兮使我心茫然龍鬚挂線鵝項仄觀音斗閣閣
王扁閣龍鬚閣鵝項嶺觀音閣滾滾湔流自西極鼉吼鯨旬

日夜顛中有巉嵒之亂石當關不許舠艫前上有截業之
峻坡亢陽不許枯槁牽沃野千里古人言無地何曾借滴
涓山栖鳥宿老林裏晨星落落罕毗連刀耕火種同作苦
春蕎夏麥婦子閭父老告予土不堅霖雨十日萬壑喧崇

山骨立失背肩其瘠土也如此吾民何以謀生全我無鞭
石鞭鞭去惡山惡水成桑田我無鑿山鑿鑿去溪頭立石
爲平川古人割雞間歌絃琴聲嫋嫋有餘閒讀書浪說希
前哲斗大山城撫字難頭童齒豁氣力綿日對羣黎愧倦
錢我安得藉神禹之庥靈雨飄飄風僊僊桃花杏花香有
色赤土白土春增妍登石紐之山兮使我心茫然中幅甚
長節錄其首尾

寧遠知府覺羅祥鼐字仲調宜喜山遠眺五首宏音亮節
欲踵空同滄溟後塵峻嶺秋高接錦雯連營幾點望中分
千盤路轉人初到萬馬風生日欲曛耀雪弓刀排戰壘掀

天金鼓起征雲一聲畫角千旗動列帳橫開待點軍三鼓

崑崙指顧中

副將軍近出奇兵克達爾圖山梁

磨崖竚紀鄂褒功山當缺

處層樓出路到窮時鳥徑通簪筆客逢新給事

謂敦甫插民部

紹人識舊元戎櫓槍計日清遊騎飲至千官拜舞同轉粟

飛芻幾歷冬秋來喜奏凱音重揚鞭會見山歸馬躍治何

當器鑄農萬里風沙消鬢短九天雨露到邊濃但教職貢

修天府王會何須別漢賓蕭蕭落木振邊聲憑弔無端感

慨情此地祇今餘牧馬當年有客結冠纓

馬軍門虎昨歲正月戰死于此

江聲東下流偏壯爽氣西來雨乍晴更把玉鞭雲外指斷

壕殘壘亞夫營小度芳辰抵一年漫垂人字炷香烟坐忘

塞外千峯雪夢到江南二月天舊雨有時來夜話流鶯更
不攬春眠可能作伴還鄉去照眼濃陰草色芊仲調嘉慶
丙戌進士

申遇祿乾隆癸酉孝廉其伯祖名直精於醫診視病脉能
決生死時曰性嗜酒延視者必備酒蔬不問謝診後卽席
豪飲大醉信筆成方病雖重飲藥立愈其有診後並不舉
杯盤桓席閒漸而翱翔庭除出遊阡陌久之旋席成方者
其病亦愈至於往返再四徑去不復者病人雖尙能飲食
步履而另延他醫百無一生故延者每以直之飲否爲喜
憂

龍安府控扼西北爲蜀藩籬平武縣附郭五關故迹猶存
知府魏裔魯題明月關云江隨峽裏轉百折到龍州古渡
明殘照孤村橫小舟猿啼湖水山鳥噪荒邱太白今何
在空聞樵牧謳署平武令徐炎題署內文武祠古梅云孤
宦邊城駐雙清此契深江山春雨色天地古香心故國三
更夢靈祠半畝陰西風林杪馬把酒月明林魏太守直隸
副榜順治年閒任

清溪處萬山之中陳登龍度關山云度關山道路難下有
九折之峻坂上有百疊之雄關卽竦高高不可扳磴多徑
仄石巘岼凌冰堆雪望漫漫前啼怪鳥後射豺負者載者

日萬輩行不得兮步躑躑度關山道路難一朝失足不可
援使我見之摧心肝又度關山關山亦可度王陽雖回車
王尊曾叱馭先人遺體不可忘食君之祿安可去前日人
歌出塞行今朝荷戈人從征前人後人車不停車不停去
無數度關山關山亦可度男兒生不封侯死抔土使我聞
之沈百慮卽來關大關如建瓴小關如伏虎東西隔十里全
蜀此門戶湍流門岷山冰壑矗翠柱羊腸道一線欲蹴難
布武天設限華夷據險自往古盡瘁漢丞相經營唐節度
征蠻勞旣成禦番計亦苦所以古時人履此衷恆憮迴車
固從容叱馭豈莽鹵忠孝各有合進退要自主我本爲王

程往返難盡數道阻心惟平視高恆培塿行行且止止山
水吾所取

富順縣知縣錢紹隆宿響石山聞滇南報捷詩巴焚頻年
苦戰爭鯨波此日靜昆明風清六詔停傳箭雨灑三江徧
洗兵茆屋人歸聞犬吠古庵僧在起鐘聲何當生聚繁林
總紅杏青蒲處處耕

蠻中造麴餅晒乾將飲酒置罈中沃以熱湯須臾成酒以
竹管通其節插於內聚客環坐以口就吸謂之咂酒重慶
一帶民間亦善造其味醇厚未知與蠻中同否華陽丞曹
三選號扶谷咏之云蠻家釀法殊不藉黍與秫青稞土所

宜菽麥任牽率不知何毒藥麴蘖嚴且疾醞合一器中酒
成不十日傳家古銅餅呖然容斗實其高只有咫其徑五
之一長耳聳其旁提挈手無失腰腹圍葩華觚棱鏤蟬蛭
坐客紅瓊瑜捧進屈右膝高插碧篠材中通去闕室以口
就咀之少嘗亦芬苾飲者猶未厭餅罄已告畢燂湯益以
杓遂巡氣四溢勸客再三飫醺醺味愈出始知空桑中別
有杜康術寄言王無功酒經當附筆綏靖屯故金川地萬
山林立天寒早雪兼多冰雹番僧繞田誦呪或不得降又
或降於澗谷田中得免亦一奇也作止雪彈陰崖萬古積
冰雪老墓踞之爲窟宅有時啓蟄爬沙行吐氣竟天色黃

白居人知是雪彈來颶風四出驅雌雷忽然火礮向空擊
虛空粉碎天爲開別有婆羅門呪以密祕法保爾麥黍菽
轉移在一霎古來禦雹原有職愆陽伏陰無失節天何縱
此食月妖又向人間作蝨蟹吾聞李左車司雹神不虛願
收大權勿旁落毋使山陬海澨冒竊而睢盱番僧建喇嘛
廟塑佛公佛母媾媼之形號歡喜佛夷俗禮拜率堵波如
山立化人城幻人域重檐架拱飛翬翩歡喜佛塑億萬千
花鬘寶衣纓絡纏摩登咒宣作祓戲演揲兒法番僧傳蠕
蠕蠢動蟲蟲天鬼物青紅森變相護法神如藥叉狀嘻嘻
咄咄火不焚恠事禍水漂情根佛公佛母此生活摺疊連

環鎖子骨枯骸作枕是人妖人捧枯骸喚生佛羅刹國尸
盤陀無遮會菩薩魔吃得針鋒方證果一轉輪時野狐墜
可備風土志

四廳專爲撫夷地險山多馬邊尤爲夷匪出沒之區國初
沿明制設馬湖知府康熙閒夷匪陳金作亂王敬公山東
人以進士補縣令於東關拒戰射死賊首身中五箭乾隆
初改馬邊廳嘉慶閒我眉雷波夷匪滋擾同知周斯才號
夢溪金陵人請兵查辦民得安居作岡外行有序邊城面
東負西以營盤山爲主山之西有盧稿溪屏峰插天再西
爲大有岡岡外鄉與蠻地接壤以溪溝爲界今沙壩子對

河有梅子壩者烏卜土百戶住牧處也壬戌三月十七日
因公赴此往返四日雖距城不及二百里而深入蠻地率
多老林路徑崎嶇爲生平所未歷自大有岡外經過有核
桃坪雞公嶺蔡壩子諸皆險絕回憶秦嶺蜀棧如劒閣綿
竹古人所盛稱者殆遠不及此因作歌以紀之龍湖吏懶
日無事公餘檢點蠹蟬字忽傳岡外有公趨僕隸奔馳宿
旅次西山壘壁故營盤山上有明時舊營故名撐橫怪石激怒湍
籃輿宛轉撥雲上回首城堙已倒看水深汨汨循溪壩城去
三十里爲壩上人家幾村舍我爲麥飯暫停驂巖壑東登
水碓壩復西下排雲列障絕援攀道是盧稿溪上山峰高疑碍日

月過此外豈復有人寰巉巖摹頂望大有石棧雲梯誰引

手飛猿絕鵠軼重霄花板諸岡攢峽口最後天峯並梅嶼

永興場對河爲天寶山鴻溝劃出夷巢阻煙霏霧合共徘徊

徊天塹往來乘風舉曾聞混沌闢洪荒蠶叢開國何茫茫

叩嶮越舊吾西土賴因乃在山之陽明萬厯賦乃黃鄉叛討以兵既平設立安

邊廳建城千巖萬壑自邃古木魅山精走豺虎芟夷樵徑

亂山巔置身榛莽驚日午神禹往蹟浸湮世柯斧誰尋伊

何歲蒼虬顛倒臥煙霞爲棟爲梁都不計開墾老林者率先伐山木緣不

通水道無由運用大者多至十餘丈橫臥山巖歲久悉就腐朽中峯柱立宗動齊大有岡中峰萬

仞屹立如砧天九重誰開鳥道絕天梯捨身蟻附魂飄颺

最上者爲宗動天

怕聽鳴澗萬仞低世路險夷恆對待畏途那意遭頻殆人
力既竭鬼神依聳立不覺形骸在欲下葛蘿蹊幾曲卷石
不堪容側足盤旋木末鳥呼人似戒顛危審立躅

夔州郡守江權自廣元至昭化道中云蜀道連秦棧葭萌
蜀北鑰重關扼五盤龍門勢如削南行向枯柏江岸自開
拓遙遙望人煙稍稍見村落平流響舟楫空林喧鳥雀朝
辭漢壽城暮宿益昌郭郵符紛往來民俗尙簡略自昭化
縣至劔州云出郭卽登山云是天雄路杖策凌長風步履
入深露仰睇捫天閭俯瞰凌煙樹彈丸益昌城衣帶枯柏
渡行行逼劔門林莽紛回互山勢亘長城石堞森如鑄參

差劒戟排高下樓櫓具架閣當其衝啓閉通徒御雖無豺
虎患常懷顛蹶慮吁嗟蜀道難從古多憂懼

江太守安徽歙縣進士康

熙閒
任

娘子嶺以楊妃得名松茂孔道也戲咏之云邊塞風高嶺
上寒遠山如黛好誰看三郎莫苦連雲棧妃子曾經蜀道
難

雪山號九頂山自岷發脉蜿蜒至茂州九峯壁立玉嶂插
空積雪盛暑不銷古人所謂峯高凌華嶽雪古自堯年不
誣也大江自北來盤流山麓署州牧朱梓繩州卽事云氣
候繩州迥不侔蕭然炎暑似深秋堂臨九頂千年雪郭繞

三溪萬里流高臥北窗驚簟冷樽開河朔畏風迨玉壺一
片冰常在贏得清涼傲五侯按茂州蠻夷雜處黑虎生番
跳梁尤甚自康熙閒文武大臣撫馭有方七族歸順道光
六年各寨土百戶情願改土歸流經藩司董公淳龍茂道
尹公濟源轉詳制府戴公三錫委員查辦稱伊等久沐
聖化言語衣服悉同漢民間有讀書識字之人一時五土
百戶共五十八寨列於齊民矣

漁洋王子典蜀試富順范璚范琚兄弟同中式有才學吳
逆之亂不染僞命漁洋作詩美之其父鑛明萬厯進士漁
洋序其詩家學淵源固有自也范璚咏巴江柳云蚤是春

之半鶯鶯尙不來莫緣前日憾遂中隔年倩別緒驅歌促
歸鞭曉柝催何知城北郭竟築望鄉臺之子莫相送依依
人可憐多年芳草路幾日艷陽天隄上風吹笛江邊月繫
船馬蹄隨記取踏破少城煙夾道來車騎臨岐可勝情魚
响春點點蛙泛雨聲聲上使端相重大夫從此行橋南人
萬里何處不懸旌按漁洋康熙丙子復來蜀祭告江濱平
生獎借後進性情和雅顧當太傅明珠隆赫時有客以金
箋求詩壽之力拒不從其風骨固自剛勁惜後人式微書
卷玩好蕩然無存甚至與西樵讀書秋樹根圖天女散花
圖兩小照亦不能守可歎也

乾隆間唐景皋妻蔣氏年二十八景皋卒氏栢舟矢志教
子成名有哭夫詩清風細雨入簾來萬斛幽情何日開只
有泉臺歸路近囑君莫去入凡胎更殘月落倍添愁忍對
孤靈淚暗流君有靈兮攜妾去與君千載作冥儔淒淒冷
冷過寒年珠淚拋流溼枕邊一片愁懷無處訴昨宵夢裡
得團圓忽見門前芳草青愁思春色兩相形幽冥冥肯許還
魂路再教孤兒讀五經細雨紛紛點綠苔年年春景向誰
來素居不愛海棠色只合梅花雪裡開又七律二首靜夜
紗窗月色清泉飛淅瀝倍愁生君遊地下多離恨妾處閨
中更慘情疾生怕聞蒿里句傷心難共白頭盟舊時苦讀

殘書在誰聽
咿唔佔畢聲
除夕無端倍感傷
堂前燈火白
輝煌桃符莫遣愁
思去蘇酒難消
別恨長夢逐才郎
同入穴醒惟明月
獨畱房忽聞杜宇
臨窗泣遺痛千秋
矢共姜

邊荒之地有此節義有此風雅可以傳矣

蔣氏茂州人

傳紀多載風穴威遠令陳汝秋有火穴詩一篇相傳穴在榮縣姑錄以備考綿亘地驚赤崙巒山訝童循麓探奇跡
嶢嶢豁深空秉藁引炎艷頰燭光熊熊鬱攸氣騰上不假
噓融風幽谷閃列缺一道飛霓虹巨穴潛丹竈九轉吐芙
蓉峭立石骨冷暖之以燭龍陽燧熒臺照井絡心星通五
行試推測火無土不榮

叶

相生或相薄此理焉能窮

解綬字方來號星亭雙流人也偉儀表倜儻不事章句初
試棘闈夜雨漬兩足跼促矮屋中慨然曰區區科第困人
乃爾耶棄去專力爲詩學鼓琴旁及棊經醫卜騷人墨客
多主其家文讌之餘退居小室拈筆苦吟至忘寢食不問
家人生產先世富田宅有園亭之盛至是中落乃盡鬻之
偕其妻賣藥成都市作詩云小肆容身似鵲巢支牀對竈
室兼庖月來小酌檐前賞興至高吟几上敲墨客偶過曾
見訪市兒相狎欲論交淹流總爲謀生計淡泊生涯未肯
拋是時顧廉訪光旭提唱風雅物色方來而方來年已七
十矣著有星齋詩集重九放歌一篇磊落奇偉滿腹牢騷

發洩殆盡焉詩云噫嘻莫傷汗漫已過七十七重陽半在
蓉城半在錦江鄉歲晚長教悲落葉落葉飄蕭芳華歇菊
花弄色不忍看秋雨秋風正凌亂頻占節候轉悄然百感
都向酒杯前望帝何年骨已朽祇今歲歲啼杜鵑金牛通
棧君不見蠶叢倏忽連秦甸英雄割據長已矣唯聞碧血
萋宏濺前人已去後人思後人復去思者誰黃公酒壚歟
蕭索淒絕阿戎太息時風清月白烏啼夜逐客離妻蟲鳴
樹湘妃泣染竹生斑鼓瑟猶聞湘水瀉鱸魚正美張翰回
塞雁又度李陵臺四愁五噫何悵絕金谷銅臺安在哉浮
雲不辨人已非朝朝暮暮尚依依青蓮秉燭桃李遊莊生

曉夢蝴蝶飛卻憶當年急行樂約伴攜樽出城郭興酣何
必龍山高倒著接羅觥交酌更思浪蕩少年嬉放鴈逐犬
無不爲時或呼盧效劉毅突兀掉船若獻之酒籌難盡花
朝夕推枰豈無散局奔仲蔚樓頭白露繁子雲亭畔霜葉
赤華年詎肯爲人畱朝見紅顏暮白頭回首斜暉且飲酒
還看明月照江流頻年泣友淚沾臆舉案人傷在荊棘仰
屋咨嗟還自歌碧雲爲我照顏色

周天柱廣東順德進士乾隆閒任蓬州喜爲詩買閑亭云
自築山亭費幾錢公餘長得樂林泉好花簾外微濛雨新
火樓前遠近煙且散幽情尋竹徑暫停星駕過桑田宦途

暇豫非輕得擬醉金罍半日仙酒酌亭花淑氣融春心欲
寫韻難工新荷出水能擎雨乳燕穿簾尚怯風粉壁漸施
楊柳綠畫欄初吐石榴紅物情到處欣相賞誰道爲官計
不同

裏塘熱水塘胡圖圖初爲長青春科兒寺僧司貿政拙於
居積耗其貲羣詈逐之胡圖圖乃走之帽盒山黝林中坐
土窟食草並樹皮飲水衣朽則綴大黃葉被體不出山如
是者五年舊堪布臘旣高獨閉禪室誦經不飲食戒其徒
曰俟曩逐僧來啓戶其徒日間經咒聲未之異也亡何胡
圖圖自外入草衣徒跣髮蓬蓬似野獸羣駭詰來意對曰

師死不來誰與毘茶者眾妄之曰師適誦經何謂死偕啓
戶則堪布坐化久矣眾始聖之舉火後羣推爲堪布主一
寺胡圖圖出寺徑去羣泣跪固挽之意不忍乃曰我必不
爲堪布請於熱水塘左營十笏地我當畱羣喜立構廟入
居不食亦不言惟趺坐誦經咒諸野番供獻牛羊馬豕無
算皆縱廟側不圈禁或竊之至家馬出火灼毛髮羊作虎
豕化象蠻人懼膜拜自首歸其物亦不督過之或叩以事
不言居三載忽升座告大眾曰備龕薪老僧歸也方怪其
無病入室卽死死禪榻上拳屈如殭屍眾啓裏塘堪布誦
開路神咒堪布至覩狀心弗善之以爲謬負盛名草草卽

去堪布去胡圖圖甦起謂其徒曰彼髡而僧者腹非我我豈昧於來去者耶極不欲辨誠恐墮信心壞大教乃命累裊數重盤膝坐教其徒曰死後以次抽裊當有異囑畢仍死堪布去未至聞胡圖圖活大駭奔返眾述所教乃驚悼無人色及共抽裊裊盡軀懸空際去地四五尺跌坐合掌慈悲之狀可掬如世所塑無量壽佛像堪布悔恨搏膺嚙指出血以志過入龕毘荼畢得舍利盈升許見劫灰集節錄其概

唐韋皋禦南詔時於今清溪縣北五里許鑿海棠池環植海棠芙蓉百餘株構搖香亭其中春秋暇日宴賓朋於此

紅雲香霧闌塞街衢故世稱小香國治西宜頭尉署亦有
海棠一株權縣事劉傳經有詩用東坡定惠院韻萬里看
取摩天鵠啣子何年成拱木郵亭小閣日遲遲一種仙葩
天下獨塞外王嬙絕世姿節度流風寄幽谷桃李滿山自
紛披得似溫柔與酣足不令異產就荒委堪笑石崇靳金
屋我到沈黎春已闌貼梗亭亭時寓目是誰手植作甘棠
仰止前賢竊私淑地瘦真與花瘦同醫瘡尙惜心頭肉怨
思漫道盡虛無膏脂已飽胥吏腹瘴雨蠻雲壓頂來跌宕
風行遠囂俗種花不作看花心千古長卿此諭蜀客參三
昧發長吟我亦隨之天籟觸回憶故園錦繡閒尊前還唱

西江曲此是古人根蒂深不攜川紅攜邛竹王堂海云曩
讀賈相譜花木西州海棠天下獨那識沈黎仙尉署猩紅
數株尤不俗春風疾甚海潮來繁花野卉遍山谷紛紛桃
李黯無色艷麗真堪貯金屋憶昔韋公鎮此邦雅愛奇葩
紅映肉空濛欄檻欲搖香花氣沉沉睡未足秋風蕭颯英
雄老美人憔悴殞靈淑辰霜夕露摧芳菲敗葉殘紅滿山
腹當時珍重勝瑤林日報幾同平安竹詎意彫傷嚴道旁
山鳥飛鳴愴心目荒驛何幸覩孤芳仙姿嬌嬈猶在蜀雖
蒙瘴雨與蠻烟直可棲鸞並隱鵠我來婆婆對名友高吟
況有白雪曲他年結巢遙相憶萬里韶華成一觸署訓導

楊楫云韋南康公昔在蜀邛人僑人競蠻觸皇皇天上令
公來前軍迅奏鼓吹曲萬馬籌邊暇日多惟公之樂樂不
獨邛來東築搖香亭簪簞西拓彈琴谷秋水芙蓉自天然
春雨海棠暢靈淑當時賓從况英豪走能射生飛食肉馳
驅瘴雨復蠻烟跌蕩哀絲更雄竹香霧深沉黯不開山風
浩浩吹華屋滄桑回首僅千年嘔同太液思黃鵠我從使
君溯漢源十旬歡呼飽捫腹調鷹炙肉朋從來三宿飛越
猶未足明年想見優曇花當頭忽訝檀旃木殊方氣候判
炎涼闌檻高明快心目知公培植作甘棠作吏如此故不
俗

咏峨眉者多矣眉邑女史彭舒英詩甚有風趣雲京閣望
峨眉有感朝見峨眉山暮見峨眉山峨眉山色好雙黛空
中掃我亦有雙蛾愁比山雲多愁多眉莫載願乞山靈代
山靈不受愁依舊在眉頭

金川既平一時文臣歌頌競作彪炳冊書而進攻之難與
奮擊之勇非目覩者不能曲爲形容王述菴昶躬在戎幕
其詩細爲傳出但篇幅太長每篇節錄數語以誌梗概克
康薩爾云碉外既有柵柵外溝環之溝外復鹿角株櫛爭
參差嗟我刀斧手捷足穿蒺藜再前度重壕鎗石已不訾
橫身擲火彈揮霍星芒馳猿臂亦仰射一一皆麗平龜前

者嘯而登迴手揚旗麾後者接踵上作勢疑拚飛驟如江河湧烈若雷霆威十盪更十決小醜奚能楮五礪連屬處有隧成路踈黝然繚而曲架木枅枅奔騰忽以塌投輦供焚熾神焦鬼並爛燔灼成菹鬱攻克羅博瓦四峯云是日天凍風如刀緣厓積雪一丈高軍未及登已早覺舉鎗投奔何嗃嗃自上下下眾不動持滿而迎射輒洞豕突狼顧躅且奔乘勢飛追躡其踵別隊紆道穿林躋所據與賊地勢齊兩軍合擊呼動地兩峯連克無畱稽其第四峯亦席卷餘第一峯尙未剪領隊普爾普圍之火器騰空盡焚焚懸其首級陳其俘取其器械充軍需克喇穆云其時四

更月乃明乘黑先已穿枰檉千尋滑壁徑本絕樹槎石角
紛縱橫以手援手手捧足鱗集砌下嚴無聲月高別隊前
後起火鎗金礮聲鏗劊賊人叫呀各拒迎擣虛誰覺奇兵
升拔刀突上超躍入鯨鯢盡戮無畱刑束韋下投兩木棚
赤燄勢掩朝霞積諸蕃望見心膽裂欲潰而出圍層層黑
雲忽浮澍雨降對面不見峰峻嶒諸軍冒雨攻益急賊乘
以竄如鼷鼷邀而殲之血於砌數獲器物難方程風吹劊
槊血氣腥番君蠻長賀且驚此猶神鬼猶雷霆由墨格爾
據密拉噶拉木克達爾沙朗日爾巴當噶仰攻既不易俯
攻亦良難不見遜克爾三月稽平蠻俯攻既良難仰攻或

轉易不見墨格爾寒空列旗幟此嶺迴合倚高穹榮噶爾
傳一氣通萬層枯栢人逕絕千古雪霰山靈封嗚呼我兵
信勇決飛騰不管蒼厓裂月黑風嚴虎豹藏蟻盤狼挂登
山缺道逢三礪附其巔燿其寨落光燭天下掃羅博瓦鄂
博奔建所至無餘堅賊知此險去巢亦不可據嘯呼數千
指爪角爭迎距神鎗如星毒矢注桀石揮刀死無懼我兵
不動猶堅城黃昏扣門迨五更賊敗復聚聚復散殲其頭
目連鯢鯨遂駐密拉噶拉木撻金伐鼓朝移營此閒地勢
殊開朗高低邱隴多膏壤天晴雲日發光晶迴眺諸峯一

神王

郛縣文尚秀以舉人任陝西澄城縣平日孝行素著而尤
工於詩惜全藁失傳嘗見其畱賓有句云鑿池引水投車
轄掃徑畱花襯馬蹄至今猶膾炙人口其夫人王氏亦工
詩因姑老不能赴任畱家侍養旋以病歿臨危以詩訣其
夫云秋水芙蓉色已彫鴨爐香燼暗魂消可憐化石終成
恨不得青鸞寄信遙

蒲春華郛東八里橋人生平篤孝友行端方導誘子弟尤
殷殷不倦其沒也趙玉山輓之以詩安閑雅淡足以徵其
爲人矣詩曰洛社追陪笑語親汪波千頃坐陽春投閑栗
里思陶令招隱名山想仲倫誰更獎成佳子弟居然模範

古先民如何一馭寥天鶴玉馱瑤車遂絕塵曾無車馬到
林泉安邑誰知閔貢賢紅樹青山成小隱清風明月送華
年丰標不愧中郎贊家世應題京兆阡料得一時春社罷
岷陽三月亂啼鵑

青神令吳汝翼雜咏境闢蚕叢古南安事迹微農桑今已
徧猶是說青衣錦江從東來濛水承其委矯首望烟霄三
山如可指郭繞魚陀水城蟠熊耳山我來尋舊跡但聽水
潺潺水向中巖落蘇公寄興長行人江畔去指點是平羌
白菓波流急紅花水勢洄渡頭人佇立都待放船回啞嚩
稱絕險觸石起狂瀾旅客驚相告南行第一灘五渡乘流

便無人舟自行芙蓉開更好兩岸踏花英仙池流夜月古
閣起清風更訝三山笛聲聲度遠空東郭水溶溶猶龍此
地逢關中瞻紫氣橋畔識仙蹤三巖號名勝彷彿似蓬萊
石笋當空迸魚羣鼓掌來長泉傳舊里曾說見麒麟建院
煩王衍休祥恐未眞四時多好景怡問何人借山谷有遺
詩悠然明月夜石壁何嶙峋清泉流不息爲欲引流觴鑿
池成太極方山甘隱逸華老稱骨鯁出處有殊途芳名千
古炳厯代經沿革遙看襟帶長岷江通地脉峩嶺接天光
竹樹連千畝人民集五方不堪談往事多半是荒唐吳江
南江陰人雍正辛酉舉人乾隆十二年任

樂山杜恭行女許健爲楊曦未娶曦卒剪髮毀容誓不他
適詣夫家事舅姑嚙指滴血以祭夫墓守貞十五年臨終
以繼嗣爲囑乾隆年閒旌表縣令楊鸞詩云我昔來玉津
問津孝女渡其事類曹娥其風激童孺乃知閒氣鍾不隨
流俗錮杜氏有貞女聘作楊氏婦天桃尙未花所天委朝
露婉婉閨中息秉心慎禮度髮彼維我儀千秋識幽素井
中水不波瑤池冰愈沍白髮堂上姑白楊山足墓夜夜杜
鵑啼哀音淒苦訴逝矣懷清臺卓哉柏舟賦丹鳳五色雲
飛來華表柱感此增太息錦江日東注寄謝錦里人持身
凜跬步楊陝西潼關廳人進士

李芝字瑞五一字鶴田號吉山別號職思富順人乾隆戊辰進士爲文如宿構一日可成數藝傳其能記前生非也嘗就巴縣館舟至瀘夜不能寐有懷尹伯奇事寤寐中得句云兒餓江水側兒寒江水旁親恩江水深兒懷江水長淚下如雨至渝半載聞母病至家疾已殆問知得疾時卽在瀘夜也母歿題所執杖云汝知吾心願化爲龍吾將乘汝縹緲之峯若有一人慈惠下容餐風飲露歌泣相從選山東招遠令力行保甲盜賊屏息境內有望兒山居民有往關東者二十年不歸父衰老每於山上望之故名過其地忽心動作詩云朝望兒曉露晞暮望兒夕陽微三春花

又發九月雁初飛春復秋朝又暮兒不歸竟何處海雲黃
海波綠搔首問天天不語閱三月而得父訃奇矣後官涪
北以廉幹稱善五言詩五古初學大謝後入韋柳五律初
學少陵後入王孟佳句如亂水晴邊度夕陽雨外山水搜
崖脚瘦煙壓樹頭平地濶天垂草江長樹入雲綠睡鶯邊
柳紅酣燕外花月痕穿浪白煙氣入空無微風將短棹細
雨過長湖鶴語松烟白龍吟海氣清月明人在水風過樹
先秋野店收殘雨漁歌帶夕陽皆平淡清遠漸近自然可
傳也

關帝廟聯少佳者南充縣城內武廟懸一聯云才兼文武

義重君臣恥與漢賊同天戮力遠開新帝業威震華夷氣
吞吳魏能使奸雄破膽忠魂長繞舊神京傳爲前明任太
史瀚所作夜夢神致謝曰承贈佳聯將某平生心跡傳播
人間幸甚但某終身所自矢者忠耳懇以忠字易精字蓋
原作精魂也任驚覺猶恍惚如見明日遂改之太史英才
卓犖善爲長聯別墅自題云大江東去浪淘盡千古英雄
問樓外青山山外白雲何處是秦宮漢闕小院春來鶯喚
起一簾風月看溪邊綠樹樹邊紅雨此中有舜日堯天此
類甚多不具錄

李東崖娶鄭氏無子欲以妻兄之子爲繼議尙未定忽夜

夢至鄭家宅旁古廟外煙雲合沓蛟螭盤舞醒而異之晨
興乘馬往觀見妻兄次子方在垂髫嬉戲廟外喜甚卽抱
歸令其妻歸向兄嫂乞以爲繼允之遂送赴里塾塾旁有
土地祠此子避學輒以書寄祠中令土地爲之守塾師夢
老人言爲書生守書甚苦師醒查得其故令勿復然後以
弱冠成進士官吏部武選司主事卽李淳也故其子孫今
尙與鄭氏言爲一家云

黃豆作腐清溪每於冬至前後日凍之堅冰外結幻泡中
嵌望之如蜂房蓮子以供食單無腐相亦無腐氣得味外
味焉建南觀察徐長發凍豆腐云冰性能教玉質融遠勞

遺餉雪霜中高情自此珍羞重雅誼還憐菜把同杜老延
賓無俗物坡公餽歲有鄉風紛紛梁肉何須羨便坐清懽
免送窮餞歲筵前風致殊食單添注進屠蘇作羹合遣辛
杵共截肪應教丙穴輸餐向百年明素志讚成三德慰清
娛自註虞道園讚豆腐有三德菜根滋味平生願我本寒酸一腐儒灌
縣歲造凍豆腐饋各憲及朋好

父老云嘉慶二年冬十二月十三四等日教匪首逆徐添
德王三槐冷天祿等合楚省賊首樊人傑率眾萬餘蹂躪
新寧廣福場八廟橋黃河堰等處焚掠殆盡十九日突至
甘棠鋪距城四十里聲言明晨至縣會食時城無重兵倉

猝戒嚴人心惶懼莫知所措至夜空中作聲彷彿雷鳴聞數十里羣賊驚疑誤以爲人馬鬩填之狀懼不敢前未明卽移營去人咸以爲天幸云

王烈婦富順李九河之妻李瑞五有詩云英英綠蘋質倚倚紫蘭叢亭亭青澗底鬱鬱晚林中晚林無雜卉青澗蔭長松自言生得地芳香正蒙茸倏忽盲飈始坐爲激湍衝無人驚歲晚委化任元穹寒山青兕叫白月冷泉淙豈不憚寒烈羞爲桃李容桃李有枯榮是物無春冬翠莖犯密雪含英馥秋風采采佩仙人盛豆事宗宮搖落何足嗟惠問無終窮

我翁令文曙桃源舉人以事過我邊暮至楊村鋪詩云山
勢回環處溪聲遠近閒野蟲依草語石逕倩蘿扳雨潤衣
微溼秋涼暑漸還欲沽村落酒臥聽水潺湲靡靡事行役
那知歧路艱重陰生古木小市帶秋山鳥語雲邊亂巖花
雨後斑慙勤雞黍意慚愧野人閒

孫鑛曉度七里峽云凌晨穿徑去烟靄正溟溟馬首衝雲
破征衫染黛青奔馳今已慣勞瘁夙曾經爲愛楓林色停
鞭憩短亭高炳曾經七里峽用少陵青陽峽韻盤迴曲徑
紆起伏多險惡林深不見天怪石互交錯珠泉神工開峭
壁巨壺削偃臥松如龍黑黝多剝落登臨素意幽逶迤雙

履弱鬼火照熒熒天籟響漠漠止此足流連何必窮五嶽
遙峯澹日青夕陽淒以薄振衣上層岡長嘯自空廓浮生
半暇時偷閒甘寂寞鑛字子琢貴州清平人副榜乾隆年
閒署東鄉高炳曾浙江錢塘人游幕

徐元禧名山竹枝詞漏天難望蔚藍明十日曾無一日晴
剛得曦陽來借照陰雲又已漫空生一年活路是農工麥
隴菜畦也不通更恠園牢都嬾設牛羊露宿野田中深山
不少木輪困半委荒墟半作薪却把纖纖筋竹子架成茅
屋暫棲身鬢門初闢得挨身掉却書囊嬾更陳自道半耕
還半讀帶經鋤月又何人詰曲山灣是妾家風棚雨壁沒

欄遮狂夫莫道來容易徧處墻陰茁火麻禧字非云歸安
進士由中書改授名山知縣

蔡時田將赴青城從離峯渡入筏村道中卽景過江指青
城江村一灣綠踏沙去洲渚岸行入林麓樹密靜行人林
深鳥側目一坪淺草地十丈古喬木四圍佐濃陰數點漏
初旭便可席其閒樹裡微風出一坐訂終日蟬聲聽斷續
未到六六峰先此忘塵躅山中雨後古寺高突兀四山埋
重霧金蛇時一掣雷聲欲破柱隆隆在殿角挾風雨與助
勢方作飄灑終然成灌注朝來百道泉岩頭掛幾處一夜
山中雨山閒斷來去亭午詫客來問之已可渡便擬曳青

鞢不襪走石步雨後山益佳白雲方在路

盤谷洞在樂至縣南石刻小盤谷三字宋寇萊公曾讀書
於此張智瑩詩云叢樹亂岩口盤谷何幽奇石室卽書室
絕巘棲皋伊寇公未巷遇樂道近在茲學術成經濟天下
待平治相業炳黃閣王旦薦所知三復霍光傳張詠寧真
嗤壯哉澶淵役親征議獨持欽若與堯叟廷諍力排之一
朝陝州行曠世英雄悲我來書洞側懷古興遐思祇見石
扇橫曾無神粟遺白來公輔器抑鬱幾許時去今千載遠
芳蹤可攀追孤吟聲渺邈立聽林風吹

乾隆二十七年鹽亭縣署中畜二牝犬一產子三一產子

五相距十餘日大小各別毛色互異兩牝犬合乳之彼此無岐視有時牝犬或他往牝雞翼之牝犬至亦不怪吠此或慈惠之官和氣所感而然歟

所謂詩史非必紀成敗定是非也卽一人一物而世之興衰民之安危胥可見焉故可以維王迹邛州牧楊潮觀葭萌老叟歌木皮爲衣辟荔墻刀耕鳥耘官道旁石戶之農茅栗食幾家坐老雲山蒼山深人木俱癯頸猿鳥不知他處翔中有長年眉髯白自言老革曾充籍太平時世邏戍閒身佩纛韃試鳴鐃坐耗官倉年復年歲久人衰令罷斥三男飽飯今長成一去從軍兩力耕蓬頭諸婦共箕帚得

食兒童垢面爭祝雞舐犢別無事傳食三家藜藿羹含哺
且喜今猶逮當道塵清少車蓋山外那知天地寬山中自
覺羲皇在觀此知地瘠民貧而休養無事俱見矣

渠縣有雙忠祠明季李含乙以主客郎中丁艱家居鼎革
葬母畢破家募士編素興師戰屢捷後兵敗被執不屈死
兄儲乙孝廉領其眾整兵進討捍敵東南賊僞降被執亦
罵賊死後來多咏之者湯原振詩云歎息男兒似巾幗華
國文章竟何益慷慨當年思致身乃於末路令人惜郊生
戎馬不欲聞河山如故今非昔誰是睢陽張許倫捐軀赴
敵甘鋒鏑岩渠惟有李先生白面書生心獨赤家敦孝友

重鄉評昆弟相師凌健翮年少成名筮仕初秦郵刺史聲
噴噴三河治蹟奏明廷特拜儀郎厯主客孺慕慈幃乞假
歸流氛突熾人從逆先生徒跣入西陲北堂疾篤嗟無策
哀號未已神器移仰天椎心欲斷嗙誓將一死答君恩衰
經沉淵觸沙磧賊眾知名以禮迎迥瀾宛轉羣爭獲不辟
刀鋸又何言厲聲慢罵怒欲磔義旗共戴脫縈維孤忠感
激一當百提戈灑涕躍重圍力盡何妨屍裹革爰知馬蹶
不由人千古英雄血皆碧男兒矢志在成仁前驅猶有執
爰伯一門忠孝並流芳累代賢良應奕奕扶植乾坤賴有
人畱遺天壤光書冊

陳天佑崇禎庚午孝廉獻賊亂蜀檄召不至孫可望掠健
爲天佑與妻及二女死之門人收其屍吾東宋荔裳先生
改葬城西山川壇內學使陸登榮又葬之於城南表其墓
寧波貢生邵塾有詩云男兒從容就義超流輩絕脰陷胸
非所愛何況冰霜勵操金鐵冶心靖節一門及粉黛偉矣
陳孝廉德行文學兼城南虎吼壩賊將勢炎炎被執脅降
刀鋸逼惟有死耳肯作賊大聲呵叱如雷霆殷血淋漓罵
不息維時日色無晶光天地黯淡飛嚴霜有妻有女生何
益歸寥廓兮同褻裳收屍誰韓生始藁葬誰宋之季改葬
誰陸學使一棺夫婦雙一棺姊妹二埋骨青山山亦靈行

人猶灑數行淚嗚呼身死國女死父妻死夫節義如斯曠
代無

李元煊浙江餘杭拔貢雍正年間任榮經至縣治題云關
前叱馭曰初紅負戴人行避玉驄近縣水聲喧雨後隔橋
山色入雲中茅簷竹戶千家市柳徑花欄十畝宮天畔一
枝栖息穩未知何以答蒼穹

人之癖好殊不可解曉嵐先生載棋道士平生酷嗜象棋
而棋至劣然思之專神明可通鍵爲楊某好象棋而不精
對局輒負一日過文紀洞見二人對奕楊某觀之不爲意
局竟二人起視驚走追之不及拾其一子上有書云兩京

讓一馬一省讓雙車佩於腰間與人奕無不勝者一日失
去不勝如故

文人之筆陽舒陰慘惟其所使清溪宜頭驛建南觀察徐
公長發云亂山環擁幾家村小吏長愁客到門典盡春衫
難貰酒摘來野蔌劇充殮嶄嶄恐阻馬蹄路宿宿忻畱鴻
爪痕行役從來少清興略煩風雨助吟魂青神令陳登龍
宜頭早行云遠山低亞路開平十里嵐光釀曉晴隔樹村
庄融日脚沿溪桃李艷人行春流潑潑看鳬浴麥隴青青
有雉鳴東望蒼簑雲五色却疑佳境是蓬瀛同一地而寫
景不同如是

孫光祖郛邑掾吏也自沱江驛晚歸縣寓書懷詩曰驛樹
平田外江城落照中數村牛背笛一路馬頭風作吏羞刀
筆依人感絮蓬吾生一彈指三十縣門窮

健爲令嚴士鉉丹徒人別健爲道經四望關有作幾載令
武陽流連三戒石每慨古今尹高風永簡策紅桑近何如
紫竹舊猶劇緊茲簿領餘心期曷有極朝發大鹿山暮過
三聖驛恩恩別沈屏迢迢成小憶忽見前山雲拔地幾千
尺蒼然入應寧橫亘里盈百知是萬竈烟彌復心有惻見
說四望溪頻年增井額其東欲竟資其南或通夔中閒連
公井鹽車地無隙竈食日萬升流民五方積延袤南益州

負戴迴荒僻夜吹聞野狸晝嘯雜木客嚴或鴈遠颺寬寧
驥伏櫪其難非今茲殷懷蓋在昔我憶詹祕書按部政殊
特堂堂宣撫來擒魁無畱慝至今誦德嶽斥埃警鬼蜮寄
語賢宰官子情殊未懌何由蘇吾民償茲未竟責

犍爲諸生楊遲烈女陳國蘭輓歌烈矣哉陳氏女大義真
能明若炬不愧芳名號國蘭拚將一死扶倫序當年納聘
厥氏誰恆農有子爲鸞侶笄年正擬詠平林伊人漂泊徒
延佇天涯盼斷不歸來六七年中閒寒暑渠家物色尙頻
頻取次傳聞死羈旅矢志夫家守空幃母亡弟逝嗟誰語
白頭不嫁亦何傷一紙原庚姑退與從茲日日蹙雙蛾心

口相商益淒楚連理猶然長作枝王雖且自諧洲渚傷心
髭鬢已無儀忍向何人執筐筥不如一死謝泉臺尙有馨
香畱鼎俎一朝引決入重泉挺然正氣雲端舉君不見玉
鉤斜金屋貯紅粧粉黛成泥土縱有金泥艷一時何如芳
烈標寰宇

席閒叫喚謹呼近屠沽之所爲文人雅令古今艷稱富順
熊南沙太史與楊升菴居詞館議大禮同謫雲南得先歸
家居升菴自滇旋至富順相訪會晤暢飲於西湖行酒令
要各將本姓說古人三百少一人者飲一杯又要除漢唐
宋三代不算升菴說楊姓三百餘南沙說熊姓一百七十

以姓孤爲辭不飲後升菴補一人南沙飲一杯盡歡而罷
其時南沙之子敦樸甫九歲相隨舟中斜陽薄暮升菴出
對云落日呈萍實敦樸云迴風動藕船升菴喜曰又翰林
也贈南沙聯云文章聲價流南省經術精研貫木天
尤秉元江蘇元和舉人乾隆年間任樂至淨土寺尋山泉
云峰回林壑美梵宇傍山陰雲氣滿空谷泉源何處尋斷
碑餘古意喬木發清音坐對寒潭水應同不染心

鎮洋明經王廷偉嘉慶乙亥春西聖寺池畔軒亭初成讌
賞牡丹卽呈梅邨余太守香繞簾帷翠繞屏窗開如揖曉
山青階侵草色雲生座檻拂波光沼映亭花徑幾分勞夜

月茅檐一樣帶春星浣溪今日添新漲逸思濠梁水亦靈
奕崖蔡明府建澣亭於池前四國廣栽花木峻嶺煙霞一望收東風吹我到瀛

洲樽浮春色名山曉袖染天香寶剎幽冉冉彩雲依鳳翼
源源活水屬龍頭鳶飛魚躍多佳趣桃李陰濃記勝遊借

諸同人及余雲江余香波娛暉兄等
譙賞竟曰口占四律以誌一時之盛

許汝龍郛縣人號水南博通經史工詩文自扁其居曰梅
海鶴天終日吟咏其中幽居大隱非吾事幽居浪得名一
園秋草色百樹晚蟬聲跡未侔嘉趣心還養太平徜徉梧
竹底落落正無營春池戶外春情澹池邊野興賒乍添三
尺水已聽四隣蛙入夜星光動迴風樹影斜元亭正荒草

休認子雲家。秋日懷蔡雪。南園扉深閉。染蒼苔散步林邊。
去復回。一徑野風翻草樹。半池秋水寫亭臺。貧無客至空。
儲味病有詩逋。却愛才近日。故人吟咏好。寄書先報菊花。
開。秋夜黯淡空林日已西。蕭蕭風物似山溪。屋圍細草蟲。
聲近窗寫喬柯。月色低倦影乍。顏昏入夢愁心未了。漫分。
題更闌院靜無燈火。安穩幽禽樹上栖。

吳梅梁侍御傑由陝西典試卽來川視學闈中和徐香珏
韻玉宇相逢盡是仙。榜花消息問簾前。入門頓覺人天隔。
傳鉢深慙弟子賢。

房師姚象詩先
生曾典陝西試

河嶽英靈歸此地。周秦

文字想當年。瑣闥曾賦西江月。

己卯年曾
使江西

陳跡回頭一悵

然天教勝境屬詩仙
朵朵蓮花落眼前
靈嶽結成才子氣

此邦爭說使君賢
蓬壺舊籍曾耆宿
梓里遊踪感昔年

客傑

江右各占新巢如燕子
秋風何日去翩然
邵篠林琨送梅

梁侍御督學川中次韻益部遙迎閬苑仙
芙蓉花發小春

前川原擁蓋承新
寵風雅扶輪仰大賢
壯志鵬程九萬

里舊遊鴻跡廿三年

嘉慶初年曾遊蜀中

從知劒閣凌雲上
迴首蒼

葭思渺然冰壺懷抱共澄清
字水文山待品評
吟思沆花

溪上月離情折柳笛中聲
題橋事蹟畱青汗
射斗光芒耀

紫京一路皇華秋色裏
霜霏鷺堠麴塵輕

段允持河南懷慶府濟源縣貢生由尉氏教諭捐陞知縣

康熙丙申謁選在都屢夢放舟至一地耆老二三人迎于江干城垣殘闕街市寂寥至內居室歷歷可數偏東有廳數楹殊可退休旣寤告諸同選原任江安令莊承祚曰如君所言殆蜀之江安歟未幾果得是缺赴任抵玉北溪紳士書吏相迎至縣一如所夢事簡民淳囹圄空虛惟栽花種竹諧聲律快論而已

巴縣張子蕃大昌原籍貴州捐郎中又改捐州牧好爲詩著有蕉月山房遺稿秋末書懷云浪遊千萬里轉眼看秋歸鄉夢亦時有名心已漸非菊花如我澹鴻雁寄書稀無那瀟瀟雨新寒上客衣靈寶曉發云曉行殘月在清夢早

寒催劒立山容瘦崖奔石骨頽馬從荒戍轉人向古關來
鎧火穿林出蕭條野店開朝天關云高陟朝天路攀雲絕
頂臨危巖荒徑滑匹馬亂山深月朗窺溪小蟬疏聽樹沉
從今身近日放眼豁塵襟江景云野漲山溪合垂楊帶雨
眠懸崖藏佛寺深霧出江船蘆長沙栖鷺帆移水接天仙
槎如許借尋棹白雲邊

鄰水孝廉甘大琛棠牧大理寺太卿甘秩齋家斌之姪孫
也秩齋立朝敢言刻有詩文集棠牧承家學有廖烈女詩
氏幼時其姑母爲之媒字其夫家之姪其姑後以不謹聞
女心薄之漸聞翁媼亦無正業欲爲子完婚卽爲搖錢之

樹女父母固長厚不敢悔婚每向女歔歔女笑曰願無過
慮女終不貽父母辱及星期之前一日賓眷雜臨家人不
及防女閉戶自縊衣履皆以密線縫紉之可謂見幾早立
志決矣丁酉六月遊大竹聞其里人言以例不得旌乃爲
賦之廖烈女生大竹絕代幽居在空谷抱得松筠冰玉心
涇清未肯隨波逐解一或死太山重或死鴻毛輕死生輕重

安足云捐軀決脰非狗名烈女之死猶如生

解二不是乘龍

客空把紅絲繫鴟鳥牒鴛鴦判入煙花記墮茵墮溷雖憑

天阿儂自有平生志

解三

桃夭春月三梅標傾筐七之子賦

于歸喜報芻尼吉不怨貧歸賣絹郎生憎辱墮添酥籍

解四

山上女貞樹路旁楊柳花妾本良家子如何入狹斜爺娘
爲女長咨嗟含情看阿母強笑語阿爺松柏異桃李琴瑟
非琵琶解五邯鄲古才人乃嫁厮養卒委身喪其璞不如棄
溝瀆黑白去就須早明拚死勿爲几上肉解六獨居閉戶無
人見白練斷送春風面俟堂俟著空復情金翠綺羅素非
願倚門慣賣笑行路人亦賤解七未履婿家門未謁夫家廟
猶是女兒身地下應含笑下土聞之目論多謂女輕生等
蟬噪解八烈士勇見義哲人幾先知回車去墨子返駕聞宣
尼賢聖有明訓或爲愚者嗤吁嗟廖烈女致命甘如飴解九
存詩足維風化

榮邑鄒學山號太和乾隆甲寅 恩科舉人素行端方學
亦淵雅從郡守遊凌雲寺云荊州不識識嘉州喜侍凌雲
載酒遊風月至今真得主江山自昔勝封侯漏天彷彿垂
三島香國依稀現十洲莫羨高標丹嶂好石湖乘興上高
樓

劉澹亭德煜南充拔貢任榮縣教諭和余秋海棠詩用漁
洋秋柳原韻新秋有客黯消魂獨對芳叢欲閉門好睡仍
如春有夢非啼却似淚多痕微含酒暈宜疎雨淡抹胭脂
炫遠村看到牆陰偏綽約凡葩俗艷不堪論弱質娉婷未
被霜丰姿絕好映橫塘妝非怕冷還燒燭袖乍驚寒待啓

箱不慣承恩依姊妹料能解語媚君王所嬌何必誇金屋
早向碧雞尋舊坊天際雲光暗想衣美人相對效顰非芳
心耐此蛩吟从晚景饒他蝶舞稀有粉縱和明月墮無香
不逐野花飛隔籬時露嬋娟影幾度鴻音莫故違孤芳那
肯倩人憐落葉蕭條掃暮煙薄命生成聲寂寂幽居習慣
意綿綿草堂無句畱遺恨花樣因時惜盛年應是蓬萊仙
骨好珊瑚開向五雲邊

尹竹虛富順人少治賈累鉅萬後築室于山水幽奇處讀
書喜爲詩望樓臺寺云眼底嵐烟散分明露翠鬟寺藏修
竹裏人在遠峰閒鍾動聞昏曉禽飛自往還擬將農事畢

晴日好躋攀幽居靜觀云村落茅茨外門前眾綠羅柳絲
長似線瓜葉大於荷地僻塵氛少巖幽野興多不嫌時獨
步嶺半聽樵歌冬日山行云一峰豎立一峰橫翠點斑斕
逗早晴愛看野雲登絕頂別尋谿徑覓歸程烟銷日出霜
無迹木落天寒鳥不鳴賴有迢遙風物美放懷何處不詩
情初夏所見云桔槔聲歇好扶梨繡野平疇望欲迷飛絮
亂飄堤左右新秧分插畝東西花閒栩栩春駒舞竹裏深
深謝豹啼更喜昨宵甘澍沛潺湲一帶響前溪

楊誠村芳官湖北提督在廣東軍營以病告歸公貴州人
少年落拓精天文星卜諸術投軍爲營書楊忠武時齋奇

之積功拔擢至大將與通譜公善書酷愛聖教序時時臨摹爲人書聯字亦勁健有同宗侄孫女集聖教序作詩百首壽之才思濬發公大喜以爲才女當爲擇配時岳大將軍之裔以蔭爲叅將少年美秀能詩爲媒定之人稱雙璧詩刻石異日當訪求

廣安州牧劉有儀號碧溪江西人多蓄姬妾七十餘猶生子傳有祕方以年老罷官猶坐挽四力弓夜于紅紙書蠅頭細字道光二十五年卒卒時無病偶語家人曰吾從不恍惚今忽心動體覺不快殆將歸也翻閱時憲書乃曰後二日卽佳有早晚二時求沈春浦爲決擇以後時更吉處

分家事語姬妾云身後欲嫁者不必強畱各分以衣物作書與子之在他省候補者囑至時啓封不知其中何語屆期沐浴更衣集家人曰吾前世廣西鬱林州某寺僧也爲土人欺凌太翁爲此地典史爲吾伸雪心感之歿遂托生爲子擾擾八十年竟成何事語畢微笑而逝

嘉慶辛未資州有人掘土得銅牌長三寸廣二寸厚四分上繪小像鐫醉仙二字腹刻絕句云中山徒命侶河朔漫飛觴儘把千鍾酒今宵醉一場不知何人造也

安岳某歲飢家貧攜幼兒出走至資陽行乞臥病竟卒村有李姓饒于貲樂施予眾以兒無依委之收養使在學館

供掃除師以書授蒙兒竊聽口誦所授者未習兒已熟矣
師奇之言于主人主人有子婦孀居有嗣子更抱兒爲次
子數年入泮鄉試獲售思本生母欲訪之第不知何縣父
何名茫無所之漫遊庶幾一遇夜夢有女戴冠立山上招
之醒倩人占之卜者曰女加冠安字也在山于岳爲近其
安岳乎往訪無端緒偶至旅店遇老人言之老人曰有此
事今居某園側賣菜自給當是汝母卽求其指引夜已深
叩門姬出問備言狀婦云兒乳旁有黑誌解衣驗之良是
相抱哭迎歸資陽奉養終身某官成都教授爲母立坊
李大興四川水手往來荆襄江中多石舟行甚險大興積

錢貿易開米行銀至鉅萬乃覓工鑿石歷年耗金五十萬
川督鄂宮保奏聞 恩賜職銜其人至今猶在以水手有
此胸襟固不凡也尙欲鑿夔州間石土人以彼地風水所
係阻之惜哉

洪石農範家貧以布衣遊蜀工畫善書兼喜作詩貴官多
愛之入蓮幕隨軍營辦理諸務軍功議敘得官宰富順升
瀘州游至道憲字極老重畫着色花卉饒生趣市肆多僞
者徒存形骸耳大字多刻石以傳歸時載金三十萬隨意
寫石雖小幅送質庫得十金以饋戚友之貧者公浙江人
今多珍藏其手跡

葉小珩云鄰水縣葉某買雛姬教歌舞以遊四方得厚金與匪徒等有怨匪等瞞其出妻妾子女孤處無鄰率眾夜入室搶掠一空輪姦婦女後盡殺以滅口月餘無知者地保催征排闥入見屍皆捆縛殺戮甚慘大驚報縣票差四出緝訪毫無影響偶坐樹下假寐有犬以喙觸其耳醒而叱逐復寐犬復至如是者屢怒甚欲殺而烹食之逐犬犬奔入一小室見五人聚賭犬咬四人衣獨遺一人差疑犬殆有故盤詰其人言語支吾鎖以見官審得其情索贓纍纍起獲多刀每審犬必隨眾上堂賊莫記殺人爲何刀犬一一嗅之口銜出者卽兇器殷有血暈一賊堅不承刑訊

死移屍出犬嚙去其耳及定案犬不食而死嗚乎義哉

嘉定有南瓜會或數年或七八年忽南瓜中結一最巨者
集眾作會賽神沈荏齋曾見之長約二丈橫臥高五六尺
觀者駭絕又有白蘿蔔亦不定幾時出一巨者大可兩人
合抱

龍安太守鄧樹棠存詠好爲詩咏俗事俗物以俗語描寫
形容曲肖或議其近俚予謂此打油詩之變調也打油體
近絕句此以古體行之均足解頤昔楊鐵厓樂府獨創一
格譏之者以爲詩妖而奇詭有不可磨滅處尤展成作明
史樂府仿其格調誦之娓娓動聽樹棠亦自樹一幟也有

僕皮姓亦通詩長齋繡佛樹棠好靜僕亦無事靜坐故特
愛之僕前侍陳道憲陳爲書扇及卒僕勒其像于孤山以
搨本裝長卷裱其扇于後自作記乞人題詩王遲士題云
深蒙青眼劇憐才詩扇裝成入蜀來穎士從知難再得相
思明月幾徘徊

余提臺步雲少年苦貧遊街市測字帽上粘紙條寫窮不
久三字在興史署前危坐高談典史某出未之見也怒其
不起掌責辱之余忿投軍爲營書積功官至四川提督性
好讀書手不釋卷倉卒臨陣置書于懷賊發火鎗鉛子適
著書未傷肌肉亦喜作詩嘗與人借網鑑手加批評甚有

議論貴後以重金遺典史稱好友謂非一激之力不至此
亦大人氣度余廣安州人典史姓牛名夢祺浙江人時署
州吏目

大江有險灘曰道士觀陡崖壁立有孔穴臨水江中有石
斜互逼水趨崖浪急勢猛舟觸崖立碎或撞入穴不得出
人以爲苦藩憲董樸齋淳深憫之首捐萬金更募三萬金
令崖上支架繩縋工人而下於江流鑿石石去灘平舟行
無患董公山東東平人

大包山在洪雅出錯甚高峻俯視王屋戕眉皆在足底惟
六月不雨雪亦必設火圍爐如北方嚴寒之時山上以木

板支屋過鑽天坡直上五六十里鑿石爲磴堅冰滑足一墜命不可知矣下此爲溜沙坡在山腰有鉛廠三處屬藥經每廠聚集一二千皆無賴游民山寒竝不生包穀皆下山負米風起人卽伏臥否則飄落林木陰森不辨路出根有二海子沉沉碧色在山不敢語怪語則冰雹立至大如雞卵

大相嶺高三十里無林木而濃霧迷漫上不見日下視不見底至山頂過路口則赤日杲杲俗呼陰陽界下此二十里路有二十四盤卽清溪城城仍在高山也吾東張曉村過相嶺不敢乘輿以繩繫腰二人挽之過建昌小相嶺更

高于大相嶺大相嶺僅及其腰傳言王尊叱馭卽大相嶺
地古名九折阪今雖乘轎猶須牽挽何以漢時叱御迴車
曰御曰車似非轎也今之道路日見開闢反險于古昔必
無是理相如題橋異日必乘高車駟馬過此橋至今星使
往返皆以肩輿未有乘車而至者自寶雞至成都車不方
軌馬不竝行勢不能也史冊言之後竟無疑之者他處人
不知何蜀人亦無辨者臣遊經此者亦復不置一詞豈相
習爲固然歟古今疑案此爲難解

辛巳同年沙博齋廣增性情和雅讀書人本色補儀隴令
喜爲詩見其題富貴圖云東風片片雨絲絲釀得新紅一

捻脂占盡人間清貴福太真顏色謫仙詩風流瀟灑才人之筆也

錢復齋宰樂山時與李子茂元綦交善及任雅安卒眷口不能歸其子來樂山謀開奠冀得賻金作費竝議嫁復齋所遺少妾子茂聞其事夜招至家力止之云官斯邑卽嫁妾于斯邑之民毋乃不可後得賻金僅二百不足用子茂慷慨贈八百金乃得歸古道可風今人不多見子茂捐鹽知事其兄任湖南阮陵縣前卒聞子茂之父厚德尤著宜有肖子

峨眉張玉田熙宇和尉琴南山花八首元韻寄托遙深琢

句工麗有情有韻咏物高手也白白紅紅畫不成空山寥
落客心驚何時幽谷移佳種幾度間愁累瘦生出世有誰
顏色好托根原自品流清年來榮悴尋常事未改天然野
性情不關長安紫陌塵山中一樣有陽春也思逃世偕高
隱未肯傾城讓美人樵徑雲消巖草綠洞門雨過藥苗新
金鈴繡幕知多少寂寞煙霞剩此身記曾含睇斷人魂消
受東風一面恩根弱自難移上苑品高原不入朱門羸
洲春到風無信繡戶人歸月有痕自是生成林下質不須
細雨怨黃昏平生不受綺羅情流水斜陽別有天世上幾
人誇富貴此中何日不神仙修來泉石供幽賞悟澈繁華

有定緣爲報當時金谷侶故人已抱白雲眠夢繞江南杜
若洲亂頭粗服亦風流生能解語誰相識開竟無名我亦
愁雨外鷓鴣芳草路風前蝴蝶夕陽樓馨香何必求人採
身比幽蘭分外幽碧雲籬落帶柴關獨立娉婷好玉顏不
遇陽春都絕世坐收清福有名山烟痕弄曉溪千曲露影
浮空月一灣不識軟紅塵上土羣芳何事戀人間一邱一
壑有心期敢怨年年雨露遲雜處那容荆棘掩亂開不遣
女兒知朱簾畫閣非今日俗李粗桃自一時最是行人回
首處杜鵑聲斷費相思生涯何必薄山林一夢琴尊醒夙
心不惹窮愁原性定難空色相是情深天寒自托樵人慰

日暮誰爲小草吟
除却閒雲和野鶴
紛紛何處覓知音
龔少蓮扇頭有詩云
好花原是女兒身
管領羣芳亦美人
兩手裝成香世界
阿儂心上自多春
東風催促下瑤臺
萬種繁華次第開
笑我平生多結習
不妨片片着身來
乃沙博齋題散花仙圖錄之

巴縣郊借夫之杰作詩成集
畫花卉有名士風韻
室張氏美而賢
畫蘭於少蓮便面
借夫題詩其上
乃昭君怨也
寥落花容冷
漢宮君王祇解重
和戎忍看荒冢埋
烟土何苦圖形
罪畫工環佩夜寒
邊戍月琵琶聲慘
塞門風黃沙白
草秋光老無限
淒涼付斷鴻
烏江渡云東渡
依然可作王

轉因父老愧還鄉高歌慷慨畱生氣名馬悲嘶戀戰場天
命有心收赤帝英雄無計庇紅粧江流不斷精靈杳剩有
漁舟弔夕陽別龔少蓮云小聚經旬又遠行驪歌唱亂子
規聲遊蹤如雨吹將散奇氣橫雲悵轉生放眼古人皆幻
影驚心何物是浮名蓮花幕底詩千首一樣疎狂見性情
俱蒼老音調亦鏗鏘厯落

劉畹香仁溥成都孝廉現任忠州學正題楊文泉涼山踏
雪圖蓋從軍雷波作也詩云皚皚确确山形惡晰晰漚漚
雪花落赫赫明明王師出糾糾桓桓虎穴入層巒瘴霧濕
雕鞍腰橫秋水刀光寒長途請纓氣無前直把儒官作將

官先生束髮嫻韜略短衣匹馬凌崖嶠到眼荒涼接地陰
天舞玉龍照丹心汨汨烽煙警雷波孤軍其柰裸夷何怒
揮魯陽返日戈涼山一帶尋夷窩山隔蜀滇森簪笏攀岩
人爭龜手藥猿背凍皴懷挾纊白戰天陰鬼夜哭關西清
白傳家聲玉山朗朗助神清先生此去揚精兵何愁妖氛
不蕩平我讀采薇壯士卒雨雪霏霏勞行役我遊蔡州憶
李槃雪夜攻城師突入君恩高厚臣辛苦露宿風餐歷
險阻奇境歷歷繪丹青披圖應起劉琨舞成都向金門瀛
孝廉家世讀書以厚德貽謀嘗爲縣令亦題詩云大涼山
小涼山莽莽煙雲萬仞間朝踏雪暮踏雪南征又見使君

節盡爾何事更鴟張雄軍直搗虎狼穴山屑玉水流銀星
戈霜劒倍精神黃沙陣裏白沙飛八地九天辨風塵柳絮
密散花驚毛大如斗寒閭壓斷馬不前鑿凌斬冰緣崖走
芒鞋踏破蠻荒煙殺盡豺狼邊復邊蜀南滇北瞥眼中玉
樹瓊花共一天蔡州驅鷺鸕滹沱聽流澌千古英雄各出
奇雪眞爲瑞吉占師吁嗟平山登燕然丈夫志報國何心
辭勞動有邊不築受降城先生忍教休鐵騎君不見凌煙
圖上寫鬚眉滿身雪花饒風儀

李海颿觀察從軍剿夷匪卽所見爲詩橫山兒云橫山兒
道旁啜泣號苦飢兩目不見物奄奄命如絲我行山麓偶

見之扶入城中鋪以糜問兒家何處卽在山之嶺問兒家
幾人有父有母賢且慈問兒胡若此欲語不語聲嚶噫是
月十一夜將半猱夷突至如虎貔殺死兒父擄兒母將屋
焚燬空家貲兒匿亂草中賊去不復疑回家四顧只灰燼
愁雲滿地酸風吹兒父有屍不得葬兒母存否未可知語
罷復作嗚嗚泣但看涕下成縷糜夷處亂山難防守自昔
焚掠兇慘無不爲猱曰猖狂民日困邊氓引領望王師是
兒甫七歲絕粒九日臥茅茨若非予一飽殍死殊堪悲我
所及見僅有此其地槁項黃馘撲谷顛坑知是誰作詩一
爲寫哀憤願乞高天能聽卑太平兒云太平兒年十五解

作蠻言學蠻舞一足良於行一足不能拄步履槃跚身偃
僂問何以然淚如雨兒本越雋人隨父日行賈裸裸忽至
猛如虎心欲遠颺氣不鼓反接兩手如縛雞拽入窮山真
慘毒朝使斫柴薪暮使牧童殺其他賤役靡不爲稍不如
意勃然怒鞭撻齊施百般茹苦有時乘閒欲遁逃賊已探
知重繫取將刀斫斷左脅筋痛入肝脾血濡縷復加捶折
毒烟薰骨節齟齬皮肉腐處此厯八年鳥困樊籠魚困苦
昨冬大雪壓夷巢賊夥畏寒堅閉戶鼾鼾大睡曉不醒亟
啓其門越其堵荆榛塞路苦難行絕纈纔過臨絕浦有橋
獨木架洪濤以腹蛇行縮兩股恐賊追至無活理結氣填

胸不能吐幸而渡此橋四望心無主默想水向低處流順
水前行當漢土踉蹌十餘朝忽見一村塢急呼土人來救
我虎口脫離天日覩至今魂夢間猶怖猙獰眾蠻虜我聞
兒語心慘悽作詩一爲貽軍府

木果木之難提督董天弼陣亡於錫嶺

或稱昔嶺蠻地有音無定字

顧

密齋京尹爲作錫嶺云董軍門陷錫嶺耿耿孤忠日未瞑
當時慷慨請兵行耐將軍堅不肯八十人老兼弱四山
蠻羣窺伺確蠻爲山兮我爲所以寡禦眾無善着詰朝凶
耗到軍營立草飛章劾幽鬼嗚呼沉寃兮董軍門

吳璜字芳甸號鑑南浙江會稽人乾隆庚辰進士來川委

解軍餉至登春畱佐軍務西軍潰鑑南乏馬不能行遂遇
害君少負詩名諸名流深賞之李傅杰輓以詩云罡風吹
綠神燈影鬼馬科車夜游騁玉棺骨化碧血乾博得主符
郡重領當年節度師潰時蟲沙猿鶴伏以飛韓吳丈糧絕
命同絕木牛不起封豕啼金龍箋奏碧落籍治粟官仍二
千石國殤豈但爲雄鬼一曲神弦陣雲墨屯官假寐礪樓
旁八騶五馬來堂堂心疑受替得太守豈料拜爵躋天間
翠旂孔蓋須臾散絕微荒鷄忽驚喚生死邊事死撫邊魄
奪蠻渠望風竄我聞英招陸吾各有司灌嬰紀信皆建祠
臨邊關廟走巫覡捨此盡臣循吏當誰爲丈與先公况同

第霓裳大羅天上事仙曹自把真靈圖孤子將編先友記
不識海山兜率中九約土伯誰相逢欲呼山鬼被薜荔且
夢城主褰芙蓉縷衣我已六年脫父執神君兩悲咽移來
一片鐵桂花望斷三城戍樓雪

王如玉山西靈石人家於江寧貌端凝尙氣節以貢生捐
道發貴州署貴西道降調來川卽著譽望金川軍興赴登
春行帳襄理軍事西師潰如玉秣馬礪劒移營不數里賊
蜂擁遮道如玉揮劒迎擊傷數人卒中鎗而殪贈太僕寺
少卿潘紫垣題王璞園殉難云乾隆三十八年夏西蜀大
星隕中夜金川戰歿溫將軍紛紛猿鶴沙蟲化璞園觀察

時從戎眼光如電氣如虹倚馬萬言資擘畫隨身一劒矢
孤忠蠹爾逆酋偏狡獪一旦詐降通內外無端豕突更狼
奔百萬貔貅遭毒害西路全軍靡孑遺南北二軍無援師
獨護儲胥誰與助環攻孤注勢難支慷慨策馬衝圍出或
勸公逃公怒叱手誅追騎十餘人力盡身戕公命畢可憐
二子方髫齡無人收骨荒山青惟餘健僕遵遺命奉歸玉
轅妥公靈欲問當年征戰地蔓草寒烟空灑淚招魂不復
見英姿崇祀差堪酬壯志

川蜀敎匪之變吾東死事總兵王懋功福山人叅將胥泗
起厯城人胥有卹蔭吾所素知而四川通志忠節傳無其

名二人死事在嘉慶壬戌歸里當考其詳卽如同時死金
川之難通志忠節傳有馬全而無董牛二提督不可解惟
署忠州諸城王垂重通志云山東人亦不書某縣云厯辦
軍務有勞績嘉慶三年委權忠州事敎匪擾及州境垂招
集義勇奮力追剿力屈遇害程尙濂輓忠州王公詩云憑
將一旅掃萑苻血濺沙場七尺軀溫序銜鬚聲慷慨杲卿
鉤舌語含糊鬼猶殺賊心何壯沒則爲神事豈誣青史精
靈光日月千秋浩氣與撐扶

譚子受光祐以同知來蜀挾妻妾往塞外屯田作英雄兒
女圖何立之道生題詩有云平生知己兩紅顏勝以腰間

青霜鏐豎儒祇解學兔園志士終當畫麟閣

昔諸生有輕學使者云彼千字文學院耳及考古學使出
題乃呂律調陽賦閏餘成歲考諸生擱筆涪州周文恭公
惺視學江西亦有狂生云邊省人年少叨科第何經學之
有考三字經可耳公考古試題爲連山歸藏賦大小戴禮
考諸生茫然無能措詞公笑曰三字經竟亦難考耶發落
時講論十三經廿一史文選三通諸書銜口而出一字不
遺眾始服公學博而精與前事可謂合璧

李研齋娶鍾山秀才吾鄉王西樵爲作歌中有云墨痕時
壓脣邊朱初以爲極力形容其耽文墨耳未必實事及觀

鮪贖云鍾山秀才每一出游秦淮麗人爭相窺仿嘗畫蘭
竹婢墨池侍以淡口退筆墨李詩云別有香在口莫畏臙
脂黑乃知語非空下

山陰陳二梅景初爲洪稚存及門稚存稱其七古有奇氣
官于蜀過敘州望涪翁流杯池不果遊作詩云有山不登
山笑人有酒不飲人笑貧我令一杯飛上山山乎我乎忘
其身頻年作客不知處舉杯但憶山陰春山陰城南慣修
禊流觴曲水王右軍夢中昨夜飛渡越白鶴化作飛仙魂
醒來一枕香在口滿山紅樹何氤氲山中涪翁跡尙在拍
手我欲開芳尊欲行不行波浪惡片帆飽送來江濱黃公

點頭卻笑我咫尺未了前生因郎官頭白人簿領坐惜好

景如春雲古人秉燭不復得鎖江亭上夕陽曛

鎖江亭在對江川址

下曉望巫山十二峰云巫山十二峰峰峰勢相向朝日偶

一映青紅紛殊狀錯落合地脈雕鐫巧天匠頭盆洗玉女

天花散寶藏傳聞雲雨時合併如儷伉楚王爾何在一夢

誤青嶂神仙傳本奇可讀不可訪所以一拳石亦作望夫

望豈以媚行客客子非可貺我將坐其巔隨風飛天上

張勉齋西銘成都府諸生愛鹿堂春日書懷輕風翦翦雨

絲絲料峭春寒瘦不支小睡偶然頭枕几放懷不覺口吟

詩烟波宅憶元真子風月場懷杜牧之最是瓶蘭知我意

暗香浮動沁人脾
輓主東張雪樵灌口山頭踏翠微

夏日余同

雪樵赴灌口登玉壘
峯各作七律四章

此情此景尙依稀
早知抱病怒怒去

翻悔臨歧草草歸

八月十四
雪樵送余

篋底詩篇猶似昔

余與雪樵
唱和詩篇

手抄樽前景物已全非
絕憐鎖日清談慣未解存亡望叩

扉風流頓盡感當前
搔首踟躕萬縷牽筆墨空餘才子氣

塵埃竟學古人眠
歲星幾見能爲崇

雪樵春初病愈向星
家問命以爲犯本年

大劫數從知本自天
痛絕新詩成識語果然相見未經年

雪樵春初贈余詩有恨余相見未經年句余爲友
人誦之友人曰經字不祥亦不介意竟成詩識

盛汝舟大器邨邑孝廉性亢直而詩才清麗著有碧檀欒

齋詩歿後其弟東序學博倩陳卯生爲選定序而刻之卯

生其詩友也過牛頭山天雄關牛頭山半天雄關陡立一
峯橫西偏天雄關上牛頭山頭昂天外穿雲烟關山至此
險已極行人彳亍淚痕潛朔風正寒嶺髮禿怪石槎枒苔
爛斑蛇紆螺盤羊角上一梯一梯蟬聯關上小軒覽容
膝手捫參斗非人間西望青城峯卅六南窺峨眉聳雙鬟
東俯巫山十二幻雲雨北鄰太華三峯花生蓮四望空濛
烟一掃只覺此山高出眾山巔下視澄江淨如練嘉陵島
嶼紆迴環鳥奴九龍各負弩九十九峯遙相連天生險阻
掉蜀國後有劒閣前朝天西風斥堠狼烟靜明月戍樓寒
析懸宇宙隩區聚三蜀 皇靈赫濯威八埏輪蹄絡繹深

簪裏蜀道盡化爲安便不信試看牛頭上縱橫石壁皆耕

田賣花曲

和曹易菴時
易菴無館

人烟如海錦城市十萬人家春夢

裏賣花碎喚兩三聲喚醒香閨人乍起侍婢街頭爭買花
春風隨手入人家曉妝初罷日欲午斜插花枝添容華畢
竟花樣須合格春日宜紅夏宜白風葉露叢枝各鮮名花
自古配傾國我曾街曲遇花籃麗襪雖多品不堪賣花對
我冷然笑好樣隨時君未諳世人愛花但愛色花品貴賤
都不擇好花須得金錢多襪花易購聊粉澤乃知俗好大
都然不特愛花兼愛錢花須求好錢須少聲價太高寧棄
捐孔方勢重花事薄賣向街前費斟酌所以蘭爲王者香

獨抱孤芳老幽谷醉歌行貴不必漢金吾富不必齊陶朱
唾壺擊碎西風起快意當前且自娛酈生下城七十二終
被忌功遭戮屠斜風細雨垂楊岸凝向烟波作釣徒酒美
魚肥儘可醉扁舟一夢游五湖若必平生快恩怨灞陵醉
尉何時無蓮池菴夜雨獨坐感懷雨落空階碎玉聲樹陰
牆畔一燈明談禪靜潔參無上掩卷蒼茫憶有生千古才
須求實濟百年人苦絆虛名狂來起舞西風急不待聞雞
意始驚送曹易菴客維州浣花溪上共尋春數典江源未
源岷六月寒光飛雪嶺一鞭殘照老風塵詩情好爲看山
發食料須諳飲酪新此後輸君邊事熟籌邊合是過來人

村溪閒眺秋色西來澹遠空竹籬門外水溪東清池萍藻
浮花鴨小徑蓬蒿聚草蟲古寺冥冥天欲雨寒枝肅肅葉
隨風漫遊頗有濠梁意物理閒窺自在中梓潼道中到此
平原眼一開旅情無限轉徘徊人從棧底穿雲出山自秦
中送客來倚轎書成空卷軸沿途買酒犒輿僮故鄉錦水
隔潼水惆悵重經司馬臺劍州早發入棧初經險臨巖似
履冰土人朝說虎山鬼夜吹燈劍拔峯千仞城欹石一棧
寒雞催上嶺月在最高層蜀國弦空閨一片月腸斷四絃
聲花露經秋冷江風入夜清鮫淚滴冰盤猿啼哀石峽銀
河案戶橫不寐熏爐鴨冰絃澹欲斷香縷聚還散金井半

桐枯土花圓唾粲霜別芙蓉老秋生羅綺光闌干雙袖溼
流淚碧雞坊七言佳句寒如范叔知交少貧到馮驩作客
難漫與文章爭得失須知名利有盈虧秋風亂擊鐵如意
明月豪呼金叵羅茂陵風雨憐司馬吳會薤鱸羨季鷹荒
烟斷岸蕪城草老樹斜陽古苑花皆可誦

眉州之蘓祠卽當日故宅有老榆大數圍是老蘓手植池
中荷花亦其遺種有魚黑色是老蘓洗硯處李伯時所畫
東坡磐石像在祠中卽山谷所謂極似其醉時意態者也
馬券碑乳母碑雖後人摹刻其石已泐亦不知自何時也
周厚輅詩云親栽榆樹老當門手種荷花尙盈沼遊魚旣

黑不敢白一勾當年墨飲飽

蘇維龍官游擊嘉慶四年二月教匪張漢潮自三岔竄唐藏蘇公過之力戰三時大罵赴賊死兵丁焦忠孝恐賊毀其尸乃自詭爲蘇公被賊支解一軍皆盡賊退土人瘞其遺齒立廟以祀蘇將軍氣如雲報國淚常熒熒忽聞有賊至奮起聲如霆或曰賊萬而我五百人百一之勢懼不敵將軍曰嘻殺賊是吾職丈夫死職耳焉能避鋒鏑將軍馳而左壯士亦皆左將軍馳而右壯士亦皆右將軍愛士得士心轉戰而前誰敢後賊旣不得脫士亦不肯休顏雲慘慘苦霧合戰血噴起懸崖愁維時日向暮苦戰猶不已手

擢魯陽戈面著雷公矢須臾馬蹄一蹶不起將軍大呼曰
吾得死所矣慷慨而結纓壯士皆死之死之日難民方作
壁上觀曰有焦忠孝同時被寸剜生爲烈士英死爲雄鬼
先爲民捍大患配祀無愧焉吁嗟乎豺虎縱橫兵雜沓將
軍不死必死法泰山鴻毛等死耳得死爲難何用怯君不
見閭邱不救張睢陽身死杖下誰爾傷蘇贈參將焦贈千
總守備尙某以觀被杖自勒死

詩係陶
雲汀作

陶雲汀觀察川東其族兄蘭江名澧者來蜀相視雲汀已
擢晉臬入都江津令延主几江書院臥病時遇異人間以
病異人示之詩云倪田生計感江湖過得春光九十餘試

問長沙遷去客洞庭秋水膾蓴鱸時壬午閏三月初一日
也歸里遂卒始知春光九十過此卽無異人之言驗矣
四川藩憲李公希文兄名在文前爲江北廳強幹有才是
時逆匪方熾獲良民輒剝皮火烤或碎割以死公怒曰民
死固劫數何慘酷乃爾獲匪徒卽以所施者施之且明告
賊賊爲稍斂選精壯利器械隱若敵國賊不敢犯涪州周
文恭公煌奉 命祭告江濱回奏謂重慶不失江北廳李
在文之力也後升綿州直隸州

蘭陵三女史趙氏姊妹也雲卿友月書卿佩芳韻卿友蓮
皆能詩隨父流寓於蜀後來孤苦特甚女子知書果非

歟丁碧溪語余云友月早卒佩芳夫亡祇一女現居嘉郡
十指爲活妹友蓮適潘某潘以微員坐屯每分俸金寄佩
芳以養其老母弱弟今歲丁未潘又卒友蓮亦稱未亡人
焉吁可悲矣予以團扇託碧溪乞佩芳畫爲寫著色桃花
並題詩云筆蘸胭脂點染勻一枝摹寫上林春東風十里
紅如錦畱傍甘棠蔭遠人應酬筆也秋夜聽雨云玉獸香
殘夢乍醒西風浙瀝警花鈴梧桐庭院三更雨化作秋聲
枕上聽聞絡緯口占云涼月娟娟冷綺櫺寒聲斷續隔窗
聽不嫌風露拋梭急一夜鳴機肯暫停過灘云江水奔流
急滔滔瀉碧湍雲聯山萬疊泉引石千盤風吼灘聲壯潮

吞夕照寒此行真冒險幸賴一舟安瀘江遇雨云落葉下
寒堵殘陽冷薜門竹疎微露寺樹密遠疑村細雨添山翠
輕風縐水痕蘆閒漁笛起宛轉弄黃昏渡石鵑灘遇雨云
灘險寸心驚危舟駭浪行濃雲遮日色驟雨壯濤聲作客
知非願還家固有情來朝乞風便莫更阻歸程舟至敘州
登石鳳菴樓云登岸上江樓山川豁遠眸晚峯銜日照遠
水帶雲流鐙火孤城暮風煙兩岸秋興闌返舟後魂夢續
清遊五律頗蒼健余囑碧溪有延女師者薦之亦風雅中
厚意也友月瀘州晚泊云移棹江邊泊山城落照斜天空
排鴈字風急嚮蘆花紅葉經霜樹青帘賣酒家寒簾瞻暮

景吟賞興無涯清明云遙村烟起有人家一帶平原萬柳
斜客裏清明看祭掃紙錢飛上野棠花友蓮暮春云曲欄
干外小庭西芳草青青似翦齊一任春歸人不管梨花滿
地亂鶯啼秋日早起云深沈庭院掩重屏風細香濃曉露
微悄立蒼苔憶殘夢桂花如雨落秋衣

徐瓚字殿鵬號玉亭江蘇陽湖人乾隆丙子舉人甘肅華
亭知縣調四川新繁攻金川管西路糧餉死木果木之難
于大榕號惕菴官戶部聞變西向慟哭尋屍辛卯與李雨
村調元遇于成都雨村輓以詩云白馬秋風出帝京旗亭
話別一樽清大忠翻覺從軍樂至孝偏悲死節名血洒寒

山鵲是伴骨畱荒澗草難生因君至蜀尋消息我亦淒然
動客情玉亭贈道衡 賜祭葬蔭子按徐惕菴後知山東
濟南府曹慕堂宗丞學閔癸巳六月聞木果木之警有詩
云羽書一道報嚴更鶴唳風聲事可驚萬里不歸都護馬
諸軍空望亞夫營狼心自是忘威德虎口憑誰寄死生衛
國籌邊良亦苦昨來新築受降城昔嶺巉巖血戰時幾人
馬革裹還屍曾揮露布工籌筆纔著戎衣便死綏趙璞菴
吳鑑南猿鶴叫雲君子怨龍蛇犯歲故人悲倘逢遺僕煩
諸公 頻囑莫遣深閨少婦知

庚子八月夷匪出擾丁氏女隨母氏投奔銅河岸俱被執

殺母畱女投其屍於河女罵不絕口乘閒投河死抱母屍
浮水上樂山毛覺生大令聞其事祔祀於李烈婦祠楊績
亭玉堂通判戕邊爲之請旌作詩云梟獍集邊陲肆惡登
壘斷其鋒莫敢撓紛紛鳥獸散逃竄旣無蹤俘累亦無算
死別真愴心生還亦覩面卓然丁烈女勁節金石貫生長
蓬廬中婉婉理針線問年方及笄尙未待冰泮一家慶團
樂情惟慈母戀封豕突然來舉室驚奔竄女啼牽母衣母
走曳女腕烽火遍山坳倉皇投河岸母氏已被執頸血隨
刀濺棄屍付東流謂女美且豔女詈呼且啼啼聲震霄漢
伺隙投洪波浮沉無涯畔須臾洪濤中抱母屍忽現猶如

聞啼聲頻將阿母喚魂歸大羅天名播青衣縣採風欽大
尹廟竝江離薦我來聞芳規歛歛復感嘆人生直隄危所
爭祇一綫志決身可殲慷慨殉母難不謂蓬蒿閒是宜幘
而弁至今銅河濱過者猶傳羨撫實上輜軒斯人亦僅見
願言借彤管勒名列女傳纈亭在戕邊目覩民艱作大窩
蕩紀事詩云鼓聲擊喧闐吼聲喊咿啞傷哉大窩蕩前居
攪人午夜心驚爆栖霞作壁支木爲廬攀藤拾礪礫側足
事耨鋤朝偃豺虎夕逐猿狙冒險登梯勤播種幾成緣木
想求魚封豕長蛇實有毒毘連深山恣盤踞風剽忽然來
席倦得意去父被殺子被掠婦女伊何辜累累載道被繫

虜子然一身漏賊刃椎心泣血誰告語死者長已矣生者
何時還老者羈西河弱妻賣涼山昨聞信遞開械流涕挾
括鹽布酒擬作收贖計無如劫一空何術辦金幣昊天不
弔雨霖霑處處稻穀付歲祲惟餘蜀黍種山隅擬糶新谷
買完聚板援陟崇阿看我棲石禾迎秋已漸熟粒米狼戾
多又多耽耽黑熊夜攫人將往收穫吞噬可若何晝則伏
于莽夜則枕我戈嗟茲黑熊兮縱不獲食爾之內寢爾之
皮又焉能俯首低心儼焉受制於么麼鼓罷繼以吼吼罷
繼以鼓鼓聲吼聲喧終宵潛焉出涕涕如雨傷哉大窩蕩
前居跬步罹險巇日不勝瞿瞿胡爲鬱鬱人居此豈果視

此爲樂土既避夷氛惡更畏猛獸取慘目巖邊氓那堪苛政猛於虎

重慶府學署有太湖石明宣宗賜蹇忠定公義者公巴人住蹇家橋自都五千里移石家園榮君賜也綦江李作梅有詩云臣心如水堅如石石猶不若臣心直君恩似念臣力瘁賜臣以石置園內上苑移來五千里苔花濕繡蹇雲起宸翰還須一个臣西湖池上懸天語吁嗟乎石可爛兮名不滅況乎此石堅於鐵立品真如石丈人拜石還應日三百泐石鐫銘姓字芳石不能言石心悅君不見蓮花池上假山石棄置道旁人不識尙書門第相公家一石榮辱

不相及我今一過承恩堂

忠定賜堂
額曰承恩

寒家橋頭遺澤長搗

水洗石石逾潔猶帶當年御苑香

榮縣廖庶常朝翼事繼母孝母失明十二年矣丙午年八十雙目復明喜甚作詩云鶴髮慈親早失明長年苦作夜三更求醫究盡岐黃術海上神方製不成茯苓迭進總無功祝目情甘換耳聾悶極常思天有眼誰將秋水翦雙瞳候看霜雪上華顛介壽人稱不老仙獨有一番心歉處孫曾繞膝未瞭然終日昏昏十二秋黃楊厄運幾時休今朝放出光明藏坐看重添海屋籌綦江伍翰屏輔祥贈詩云至誠能感物純孝能格天側聞古孝子軼事至今傳王祥

臥冰上冰泮魚躍淵孟宗抱竹泣新筍大於拳脫非純孝
故胡以能致焉扶九同年友吾信無閒然通籍悲失怙泣
血居三年奮身入翰苑忠孝難兩全痛子有老母失明時
憂煎將欲板與迎起居復不便將欲子婦代寸心兩地懸
以此輾轉計不如歸耕田承歡潔滌滌扶持隨後先老母
忘所苦頤養得安眠去年屆人日倏爾沈疴痊不假金匱
刮不事扁鵲延有如霧氣撤天霽無雲煙有如昏黑夜寶
炬照金蓮細辨孫與曾閒眺陌與阡一洗諸
華筵昨日得君書尺素寫纏綿讀罷爲君喜
咄咄大奇事神妙難究宣我歌爲紀實懿行